

PABLO TI' TS'IJBU JUN CHA'AN JINI AÑO' BA TI ROMA

Pablo mi' ts'ijbubeñob jun ochemo' bΛ ti' t'an Dios ya' ti Roma

¹ Joñon Pablojon. Ajtroñelon i cha'an Jesucristo. Dios ti' pΛyΛyon cha'an yajcΛbil bΛ ajsubt'an ñumel i cha'an. Ti yΛq'ueyon ili toñel cha'an mic sub majlel jini wen bΛ t'an cha'an laj cotyΛntyel.

² JiñΛch jini wen bΛ t'an tsa' bΛ i wΛ subu Dios ti ñoj oniyix ti jini ts'ijbubil bΛ i t'an. Dios ti' c'ΛñΛ jini tsa' bΛ i xiq'ui i yΛle' cha'an i ts'ijbun ili t'an.

³ Jini wen bΛ t'an mi' subeñonla cha'an lac Yum Jesucristo i YalobilΛch Dios. Mi' subeñonla cha'an ti ch'ocΛ wΛ ti mulawil cha'an i ch'Λme' i bΛc'tyal che' bajche' quixtyañu jach. Ti loq'ui ti i jiñΛjlel ñuc bΛ yumΛl David bΛ i c'aba'.

⁴ Cha'an ti cha' tyejchi loq'uel ba'an sajtyemo' bΛ, ti tsictiyi cha'an mach quixtyañu jach Jesucristo pero yoque Yalobil Dios am bΛ i p'ΛtyΛlel. Ch'ujulΛch i Ch'ujlel Cristo.

⁵ Cha'an jach ti yutslel i pusic'al, Dios ti yΛq'ueyon lojon c toñel cha'an ti lac Yum Jesucristo cha'an mic sub majlel i t'an ti ba'ical jach an quixtyañujob ti pejtyelel pañimil tyac cha'an mi quejel i ch'ujbiñob lac Yum Jesucristo yic'ot mi quejel i jac'ob.

⁶ Jatyetla je'el pΛybiletla ti Dios cha'an mi la' wajñel ti i cha'an Jesucristo.

⁷ Ch^Λncol c ts'ijbubeñetla jun ti pejt yelet b^Λ la ya' b^Λ añetla ti Roma, p'unty^Λbilet b^Λ la i cha'an Dios. Dios ti' p^Λy^Λyetla cha'an la' wac' la' b^Λ Dios cha'an i cha'añetla. La' ajniquetla ti i yutslel i pusic'al Dios yic'ot i ñach'ty^Λlel ty^Λlem b^Λ ti Dios lac Tyat yic'ot ti lac Yum Jesucristo.

Pablo yom majlel ti Roma

⁸ Ñaxan mic suben Dios wocox i y^Λl^Λ cha'an ti Jesucristo cha'an ti la' pejt yelet. Como ti pejt yelet mulawil ch^Λncol i lu' yubiñob bajche' ñoj xuc'ul ch^Λncol la' ch'ujbin cha'an melel^Λch jini wen b^Λ t'an.

⁹ Mic cha'liben i toñel Dios ti jump'ej c pusic'al. Mic sub majlel jini wen b^Λ t'an cha'an an laj coty^Λntyel che' mi lac ch'ujbin i Yalobil Dios. Dios yujil isujm che' mic cha'len oración, mic bej tya-jetla ti oración.

¹⁰ Mic bej c'ajtiben Dios, mi ch^Λ'^Λch yom i pusic'al, cha'an mi an bajche' mi y^Λq'ueñon c majlel cula'añetla che' bajche' tic pensali c cha'len c'^Λl^Λ wajali.

¹¹ Como wersa com cula'añetla cha'an mij c^Λntisañetla ti yamb^Λ i sujmllel tyac tsa' b^Λ i c^Λntis^Λyon Ch'ujul b^Λ i Ch'ujlel Dios cha'an mi la' más xuc'chocon la' pusic'al ti Dios.

¹² Jini com b^Λ c^Λl, jiñach che' ya' añon la' wic'ot mi lac motin ñuc isan lac pusic'al cha'an bajche' ch^Λncol lac motin ch'ujbin cha'an ajcotyaya lac cha'an Cristo.

¹³ Quermañujob, com mi la' ña'tyan cha'an cabal tic jop'o cula'añetla pero c'^Λl^Λ wale ma'an ti mejliyon. Com c majlel ti cubi, cha'an Dios mi'

c'añon cha'an mij c'antisañob ti wen b_Λ t'an ya' ba'añetla, cha'an mi' tyajob i coty_Λntyel ti Cristo lajal bajche' quixtyañujob ti yamb_Λ pañimil tyac je'el che' tic subeyob i t'an Dios.

¹⁴ An tic wenta mic sub majlel i t'an Dios ba'an ti pejtyelel quixtyañujob ba'ical jach añob, mi c'antis_Λbil o mi mach'an c'antis_Λbil, mi añob cab_Λl i ña'ty_Λbal o mi mach'an i ña'ty_Λbal.

¹⁵ Jin cha'an, ti jump'ej c pusic'al wersa com c subeñetla jini wen b_Λ t'an cha'an laj coty_Λntyel jatyetla je'el ya' b_Λ añetla ti Roma.

Jini wen b_Λ t'an, jiñach p'_Λtyal b_Λ

¹⁶ Como joñon mach'an mij quisnin jini wen b_Λ t'an cha'an laj coty_Λntyel. I cha'añach Dios jini wen b_Λ t'an. Jin cha'an an i p'_Λty_Λlel cha'an i cotyan majchical jach mu' b_Λ i ch'ujbin ti' pusic'al. Ti ñaxan jini jach ti subentiyon lojon israelon b_Λ lojon. Pero wale mi subentyel majchical jach, mi israelob o mi mach israelobic.

¹⁷ Como jini wen b_Λ t'an mi' tsictis_Λbeñonla bajche' Dios mi' q'uel ti tyoj majchical jach b_Λ quixtyañu. Mi q'uejlel ti tyoj cha'an jach mi' ch'ujbin ti' pusic'al. Ma'an yamb_Λ bajche' mi mejlel i q'uejlel ti tyoj. Ti Ts'ijbubil b_Λ i T'an Dios mi y_Λl: Majchical jach mi' ch'ujbin cha'an ajcotyaya i cha'an Jesucristo mi q'uejlel ti tyoj ti Dios. Mi quejel i y_Λq'uentyel tsiji' b_Λ i cuxty_Λlel. Che' ts'ijbubil.

Lu'an i mul quixtyañujob

¹⁸ Mi tsictiyel cha'an Dios ya' b_Λ an ti panchan mi quejel i y_Λq'uen i xot'ob i mul jini mach b_Λ saj yom i ch'ujbin i t'an yic'ot jini mu' b_Λ i cha'len i

simaronlel. Cha'an ti caj jini mu' b_Λ i cha'len mi' m_Λty_Λbeñob yaño' b_Λ i cañob jini meel b_Λ t'an.

¹⁹ Ch_Λ'_Λch mi' cha'leñob aunque mi' wen ña'tyañob cha'an an Dios, como Dios i bajñel mi' lu' aq'u'en quixtyañu i ña'tyañob.

²⁰ Mach'an mi laj q'uele' Dios pero mi lac ña'tyan cha'an añ_Λch Dios che' mi laj q'uel ch_Λ b_Λ yes ti' mele. C'_Λ_Λ ti ñoj oniyix che' ti mejli mulawil c'_Λ_Λ wale iliyi, cha'an ti caj i cha'libal ti' wen tsictiyi cha'an Dios_Λch am b_Λ i p'_Λty_Λlel mach'_Λ yujil jilel. Jin cha'an mach'an majch ch'ujbi i y_Λle' cha'an mach'an ti' ña'ty_Λ mi an Dios.

²¹ Pero aunque ti' c_Λñ_Λyob cha'an jiñ_Λch Dios, mach'an ti' q'ueleyob ti' ñuc che' bajche' Dios, mach'an ti y_Λq'ueyob wocox i y_Λ_Λ. Mach'an sajlic i c'_Λjñibal pejtyel ch_Λ b_Λ yes ti' pensaliyob. Ti lu' asiya i pusic'al ti bibajax b_Λ i pensal. An ti ic'tyojñal i pusic'al yubil.

²² Ti' lolon ña'ty_Λyob añob i ña'ty_Λbal. Pero ti i cha'libal ti' tsictiyi mach'an i ña'ty_Λbal. Tontojob.

²³ An i ñuclel jini Dios mach'_Λ saj yujil sajtyel. Pero quixtyañujob ti' lolon q'uexeyob Dios ti i loc'om tyac quixtyañujob yujil b_Λ sajtyel. Jinic tyo ti' cuyuyob ti Dios i loc'om tyac xma'tye'mut, yic'ot i loc'om tyac lucum yic'ot i loc'om tyac ch_Λ b_Λ animal tyac am b_Λ ch_Λnts'ijt i yoc.

²⁴ Cha'an ti caj che' ti' cha'liyob, Dios ti' c_Λy_Λ jini quixtyañujob cha'an i cha'leñob ch_Λ b_Λ jach b_Λ i tsuculel bajche' mi' bajñel pensaliñob ti' pusic'al. Ñoj quisintic jini tsa' b_Λ i cha'leyob yic'ot i pi'_Λlob.

²⁵ Como jini quixtyañujob mach yom i ch'ujbiñob jini meel b_Λ t'an cha'an mi' c_Λñob Dios, pero mi'

ch'ujbiñob lot b_Λ t'an. Ti' ch'ujutis_Λyob i mel-bal Dios. Ti' q'ueleyob ti ñuc. Pero mach'an ti' ch'ujutis_Λyob Dios tsa' b_Λ i lu' mele pejtylel ch_Λ b_Λ an tyac. Jiñach jini yom b_Λ mi sujbel ti ñuc ti bele' ora. Amén.

²⁶ Pero cha'an mach'an ti' ch'ujutis_Λyob Dios pero ti' ch'ujutis_Λyob i melbal jach, Dios ti' c_Λy_Λ cha'an i cha'leñob ñoj bibajax b_Λ i tsuculel. X'ixicob mach'an ti ajniyob yic'ot i ñoxi'al. Pero ti ajniyob yic'ot lajal x'ixico' b_Λ.

²⁷ Yic'ot winicob je'el mach'an ti ajniyob yic'ot i yijñam, pero ti laja ajniyob yic'ot lajal winicob b_Λ. Ñoj quisintic bajche' ti' cha'leyob. Pero ti aq'uentiyob i xot'e' ti i b_Λc'tyal jini bibajax b_Λ tsa' b_Λ i cha'leyob.

²⁸ Cha'an mach yom i pensalin mi an Dios, Dios ti' c_Λy_Λ cha'an i pensaliñob ch_Λ b_Λ jach b_Λ i tsuculel yic'ot i cha'leñob jini mach b_Λ yom i cha'leñob.

²⁹ But'ul i pusic'al ili quixtyañujob ti pejtylel ch_Λ b_Λ mach'Λ wen tyac. An t'an yic'ot yamb_Λ winic yamb_Λ x'ixic. Simaroñob. Más on yom ch_Λ b_Λ yes an i cha'an. Ba'ic jach b_Λ i tsuculel mi' cha'len. Mi' mich'q'uel ch_Λ b_Λ an i cha'an yamb_Λ quixtyañujob. Ajts_Λansayob. Bele' periyal b_Λ t'an yom. Mi' lotin i pi'lob. Mi' ñajti tyajob ti leco b_Λ t'an i pi'lob. Mi' cha'len jop't'an.

³⁰ Mi' sub ti mach b_Λ wen b_Λ t'an yaño' b_Λ. Mi' tsa'q'uel Dios. Mi' q'uel ti pec' i pi'lob. Mi' lolon chan isan i b_Λ ti' tyojlel i pi'lob. Mi' lolon bajñel sub i ñuclel. Mi' bej pensalin bajche' ch'ujbi i cha'len yamb_Λ simaronlel. Mach'an mi' jac'ben i t'an i tyat i ña'.

³¹ Mach'an mi' ch'Λmbeñob isujm chΛ bΛ wen, chΛ bΛ mach wen. Mach'an mi' ts'Λctisan chΛ bΛ mi' lolon alob. Mach'an mi' cha'len p'untyaya. Mach'an mi' ñusΛben i mul i pi'Λlob. Mach'an mi' p'untyan yaño' bΛ cha'an i cotyañob.

³² Mi' ña'tyañob cha'an Dios ti yΛΛ cha'an majchical mi' cha'len che' bajche' jini yom sajtyel cha'an i xot'e' i mul. Aunque mi' ña'tyan cha'an chΛ'Λch ti yΛΛ Dios, mi' bej cha'len jini mach bΛ wen yic'ot je'el mi' mulan i q'uel che' yaño bΛ mi' cha'leñob.

2

Dios mi' cha'len tyoj bΛ melojel

¹ Jin cha'an jatyet mu' bΛ a sub i mul majchical jach bΛ a pi'Λlob cha'an jach a wom a bajñel otsan a bΛ che' bajche' ajmel mulilet, mi' tsictiyel an a bajñel a mul je'el. Como jini mu' bΛ i sub i mul i pi'Λlob lajalΛch mi' cha'len mulil bajche' mi' sube' an i cha'an i pi'Λl.

² Pero la cujil isujm cha'an yoque tyoj mi' cha'len melojel Dios che' mi' mele' quixtyañu mu' bΛ i cha'len ili tyac.

³ Ixcu jatyet mu' bΛ a sub i mul a pi'Λlob pero lajalΛch ma' bajñel cha'len, ¿ch'ujbi ba a puts'tyan i melojel Dios ma' lon al? Mach ch'ujbi.

⁴ ¿ChΛncol ba a p'aje' i yutslel i pusic'al Dios? Mach'an ma' saj ña'tyan yubil chucoch ma'an mi' wa' melet. ChΛncol a lolon q'uel che' bajche' lolom jach i yutslel i pusic'al Dios. Pero cha'an ti caj i yutslel chΛncol i jal pijtyañet cha'an a q'uextyan a pensal cha'an a cΛye' a mul.

⁵ Pero tsats a pusic'al. Mach a wom a q'uextyan a pensal cha'an a cΛye' a mul. Jin cha'an chΛncol

jach a woc' isan a xot'mulil mu' b_Λ a wersa xot'e' ti jim b_Λ q'uin che' Dios mi quejel i y_Λc' tyoj b_Λ melojel bajche' yom.

⁶ Dios mi quejel i y_Λq'uen jujuntiquil jiñ_Λch bajche' ti' cha'le.

⁷ Jini mu' b_Λ i bele' cha'len wen b_Λ cha'an wersa yom mi q'uejlel ti ñ_{uc} ti Dios yic'ot wersa yom jini wen tyac b_Λ mach'_Λ yujil jilel, mi quejel i y_Λq'uentyel i cuxty_Λlel mach'_Λ yujil jilel.

⁸ Pero jini mu' b_Λ i cha'leñob bajche' yom i bajñel i pusic'al, mach'_Λ ba'an mi' jaq'ue jini melel b_Λ pero che' jach mi' cha'len mach b_Λ wen b_Λ, mi quejel i yubiñob i mich'lel Dios. Mi quejel i y_Λq'uentyelob i xot'ob i mul.

⁹ Ñoj mach kujch i wocol yic'ot i pensal mi quejel i yubiñob jujuntiquil mu' b_Λ i cha'len i simaronlel. Ch_Λ'_Λch mi quejel i ñaxan yubiñob jini israel b_Λ quixtyañujob tsa' b_Λ i cha'leyob simaronlel. Ti wi'il mi quejel i yubin jini mach b_Λ israelobic.

¹⁰ Pero jini israelob mu' b_Λ i bele' cha'len wen b_Λ mi quejel i sujbel ti ñ_{uc}, mi q'uejlel ti ñ_{uc} ti Dios. Mi quejel i y_Λq'uentyelob i ñ_Λch'ty_Λlel i pusic'al ti Dios. Ñaxan mi quejel i y_Λq'uentyelob jini israel b_Λ quixtyañujob, ti wi'il je'el jini mach b_Λ israelobic.

¹¹ Como Dios junlajal mi' q'uel quixtyañujob.

¹² Ti pejtyelelob tsa' b_Λ i cha'leyob mulil max tyo b_Λ ubibil i cha'an i mandar Moisés mi quejel i lu' jilelob cha'an i mul. Dios mach'an mi quej i c'añe' jini mandar tyac cha'an mi' melob. Jini tsa' b_Λ i yubiyob jini mandar tyac, pero ti' cha'leyob mulil, Dios mi quejel i c'añe' jini mandar cha'an mi' melob.

13 Como mach'an mi q'uejlel ti tyoj ti Dios jini mu' jach b_Λ i n_Λch'tyan bajche' ts'ijbubil ti mandar. Pero mi q'uejlel ti tyoj jini mu' b_Λ i ch'ujbin bajche' ts'ijbubil.

14 Pero jini mach b_Λ israelo' b_Λ quixtyañu mach'Λ ba'an i cha'an jini mandar tyac, che' ti i bajñel i pusic'al jach mi' cha'leñob che' bajche' ts'ijbubil ti mandar, che' bajche' an jini mandar tyac ti i pusic'al yubil.

15 Cha'an ti caj i cha'libal mi' p_Λs'ob che' bajche' ya' ts'ijbubil mandar tyac ti i pusic'al. Ti i pusic'al mi' ña'tyañob ch_Λ b_Λ yom i cha'leñob. Ti i pusic'al mi' pensaliñob mi añob i mul o mi tyojach i cha'libal.

16 Ch_Λ'ach mi quejel i yujtyel ti jim b_Λ q'uin che' Dios mi quejel i c'añe' Jesucristo cha'an mi' melob quixtyañujob cha'an jini tsa' b_Λ i mucu cha'leyob. Ch_Λ'ach mi y_Λle' ti jini wen b_Λ t'an cha'an laj coty_Λntyel ch_Λncol b_Λ c sub majlel.

Jini israelob yic'ot i mandar Moisés

17 Jini c pi'lob, jini israel b_Λ quixtyañujob, mi' xuc'chocoñob i b_Λ ti i mandar Moisés. Mi' lolon chan isañob i b_Λ cha'an weñ_Λch añob mi y_Λlob cha'an i cha'añob Dios.

18 Yujilob isujm ch_Λ b_Λ yom Dios. Cha'an c_Λntis_Λbilob ti mandar tyac yujilob i yajcañob ch_Λ b_Λ wen.

19 Mi' lolon ña'tyañob cha'an ch'ujbi i p_Λse' i bijlel Dios jini mach'Λ ba'an mi' ña'tyañob. Mi' lolon ña'tyañob cha'an mi' p_Λs'eñob i s_Λclel pañimil jini año' b_Λ ti ic't'ojñal yubil. Ch_Λ'ach mi' lolon q'uelob i b_Λ.

20 Mi' pensaliñob cha'an ajtyoj isayajob cha'an jini sojquemo' bΛ yic'ot mi yΛlob cha'an yujilob i cΛntisañob jini mach'Λ cΛntisΛbilobic ti' t'an Dios. Mi' ña'tyañob cha'an ya' ti mandar tyac mi' tyajob i ña'tyΛbal yic'ot i sujmllel tyac.

21 Mi chΛ'Λch yujilob i cΛntisan yaño' bΛ, ¿chucoch ma'ix mi' bajñel cΛntisañob i bΛ che' jini? Mi yΛlob cha'an mach wen i cha'len xujch'. ¿Chucoch mi bajñel cha'leñob xujch' che' jini?

22 Mi yΛlob cha'an mach wen mi' cha'leñob i tsuculel quixtyañujob. ¿Chucoch chΛ'Λch mi' bajñel cha'leñob, che' jini? Mi' wen ts'a'q'uelob dios tyac melel bΛ ti c'ΛbΛl. Pero mi yochelob i xujch'iben chΛ bΛ an ya' ti i yotyotlel tyac.

23 Mi' wen chan isañob i bΛ cha'an cΛñΛlob i cha'an jini mandar tyac pero mi yΛc'ob ti wajlentyel Dios cha'an chΛncol i ñusañob jini mandar tyac.

24 Jin cha'an an i sujmllel jini Ts'ijbubil bΛ i T'an Dios ba' mi yΛle': Jini mach bΛ israelobic bΛ quixtyañujob mi' tyaje' Dios ti leco bΛ t'an cha'an ti caj i cha'libal jini israelo' bΛ. Che' mi yΛle' ti Ts'ijbubil bΛ i T'an Dios.

25 Como jini israel bΛ quixtyañujob melelΛch an i c'Λjnibal tsep pΛchΛlel i cha'an mi ti' ts'ΛctisΛ ti pejtyelel bajche' xiq'uil ti i mandar Moisés mu' bΛ i jac'ob. Pero mi ti' ñusΛyob jini mandar tyac, che' bajche' mach'an ti tsepbenti i pΛchΛlel che' jini como chΛncol i yajñelob lajal bajche' mach bΛ israel bΛ quixtyañujob.

26 Yic'ot je'el, mi jini mach bΛ tsepbil i pΛchΛlel bΛ quixtyañu, jiñΛch jini mach bΛ israelob, mi tyojΛch mi' cha'len bajche' mi yΛle' ti mandar, lajal

mi quejel i q'uejlel che' bajche' jini tsepbil b_Λ i p_Λch_Λlel aunque mach tsepbil i cha'an.

²⁷ Como che' ts'_Λc_Λl mi' jac'ben jini mandar tyac jini mach b_Λ israel b_Λ quixtyañu jiñ_Λch jini mach b_Λ tsepbil b_Λ i p_Λch_Λlel, mi y_Λc' ti tsictiyel la' mul jatyetla mu' b_Λ la' ñusan mandar tyac, aunque an la' cha'an jini ts'ijbubil b_Λ mandar yic'ot je'el tsepbil la' p_Λch_Λlel.

²⁸ I ty_Λlel i cha'año' b_Λ Dios jini israelob. Pero ma'ix mi yochel ti i cha'an b_Λ Dios cha'an jach israel b_Λ quixtyañu i tyat i ña' mi cha'an jach mi' ch'_Λm i marcajlel tsep p_Λch_Λlel ti i b_Λc'tyal.

²⁹ Pero jini yoque israel b_Λ quixtyañu jiñ_Λch jini tsa' b_Λ y_Λc'_Λ ti tyoj is_Λntyel i pusic'al ti Ch'ujul b_Λ i Ch'ujlel Dios mach ti mandar tyac jach tsa' b_Λ ts'ijbunti ti quixtyañu. Jini yoque israel b_Λ, mach'an mi sujbel ti wen ti quixtyañu, pero ti Dios.

3

¹ ¿Am ba ch_Λ b_Λ och más wen che' israelob che' bajche' che' mach b_Λ israelo' b_Λ quixtyañu? ¿Am ba i c'_Λjnibal che' tsepbilix i p_Λch_Λlel winicob?

² Añ_Λch. An cab_Λl i c'_Λjnibal. Pero jini más c'_Λjnibal b_Λ, jiñ_Λch cha'an ti aq'uentiyob jini israelob i cañ_Λtyan jini t'an tsa' b_Λ subu Dios.

³ ¿Pero ch_Λ b_Λ mi yujtyel mi cha'tiquil uxtiquil ma'ix bej xuc'ul mi yajñelob? ¿Mach'a ba'an bej xuc'ul Dios aunque ma'ix xuc'ul quixtyañu? ¿O mu' ba i lajmel i ts'_Λctisan jini tsa' b_Λ i w_Λ al_Λ?

⁴ Mach'an. Mi sajlic. Aunque lu' xlotyob ti pejtyelel quixtyañujob, pero Dios b_Λ, lu' melel_Λch mi' cha'len ti pejtyelel ch_Λ b_Λ tyac jach mi' cha'len.

Ti' Ts'ijbubil b_Λ i T'an Dios mi' tyaje' Dios ti t'an. Mi y_Λle':

Jatyet Dios, che' ma' w_Λc' a t'an mi quejel i lu' ña'tyañob cha'an ñoj meles bajche' ma' w_Λle'.

Che' mi' pensaliñob quixtyañujob mi tyojety_Λch o mi ma'ix tyojet, mi quejel a loq'uel ti wen como ma'an majch ch'ujbi i saj ale' cha'an ma'ix tyojet.

Che' mi y_Λle' ti Ts'ijbubil b_Λ i T'an Dios.

⁵ Pero mi ti caj lac simaronlel mi más tsictiyel cha'an tyoj i pusic'al Dios, ¿chuqui yom mi la c_Λle' che' jini? ¿Yom ba mi la c_Λle' cha'an ma'ix tyoj mi' cha'len Dios che' mi y_Λq'ueñonla lac xot'e' lac mul? (Ch_Λncol c_Λle' bajche' mi lolon alob quixtyañujob.)

⁶ Mach'an. Mach che'ic yom mi la c_Λle'. Mi machic tyoj Dios, ¿bajche' ch'ujbi i melob quixtyañujob am b_Λ ti mulawil che' jini?

⁷ Pero an jini mu' b_Λ i lolon alob cha'an quixtyañujob mi' cotyan Dios che' mi' cha'leñob lot, como cha'an ti caj i lot mi wen tsictiyel cha'an ñoj meles_Λch tsa' b_Λ i y_Λl_Λ Dios como Dios ma' ba' b_Λ ora mi' cha'len lot. Che' jini mi quejel i lolon alob: ¿Chucoch mi y_Λlon ti xmulil Dios mi ti caj c lot mi más tsictiyel i yutslel? lolon che'ob.

⁸ Mi lolon y_Λlob: ¿Mach ba yom mi lac bej cha'len lac simaronlel cha'an mi tsictiyel i wenlel Dios? Ch_Λ'_Λch muc'on lojon ti c_Λntisa mi lolon alob lami-talob. Pero ch_Λ'_Λch mi' lolon alob cha'an jach yom i y_Λc' ti y_Λsintyel lojon j c_Λntisa. Pero jini mu' b_Λ i y_Λl bajche' jini, yom ajlic cha'an mi quejel i xot' i mul.

Lu'an i mul quixtyañujob

⁹ ¿Bajche' yom mi lac pensalin che' jini? ¿Más ba weñonla israelon b_Λ la che' bajche' jini mach b_Λ israelobic ma' w_Λl? Mach'an. Mi sajlic. Como tsa'ix la quil_Λ cha'an an i mul israelob yic'ot mach b_Λ israelob como ti pejtyelelonla che' bajche' chuculonla ti i p'_Λty_Λlel mulil.

¹⁰ Ti Ts'ijbubil b_Λ i T'an Dios mi y_Λle':
Ma'an majch tyoj, mi junticlec.

¹¹ Ma'an majch yom i ch'_Λme' isujm.

Ma'an majch yom i ch'ujbin Dios.

¹² Ti pejtyelelob ti' t'uñuyob majlel yamb_Λ bij. Ti pejtyelelob ti s_Λty_Λob i b_Λ ti i simaronlel.

Ma'an majch mi' cha'len ch_Λ b_Λ wen, mi junticlec.

¹³ Tsucul i t'an che' bajche' i tyuwel muconib_Λl che' tyocol i ti'.

Lot jach muc'ob.

X_Λctyubil i t'an che' bajche' ti i venenojlel lucum.

¹⁴ Ch'_Λcojel jach b_Λ t'an mi' cha'leñob. Mi' wen wajleñob i b_Λ.

¹⁵ Ti saj ora jach wa' yom i ts_Λnsan i pi'_Λlob.

¹⁶ Cha'an ti caj bajche' mi yajñelob mi jis_Λbeñob i tijicñ_Λyel quixtyañujob. Mi y_Λq'ueñob i ñusan wocol.

¹⁷ Mach'an mi saj ña'tyañob bajche' mi ñach'tisañob jini yomob periyal.

¹⁸ Mach'an mi pensaliñob bajche' an Dios cha'an mi' b_Λc'ñan. Mach'an mi saj y_Λc' ti ñuc.

Che' mi y_Λle' ti Ts'ijbubil b_Λ i T'an Dios.

¹⁹ La cujil isujm cha'an ti pejtyelel quixtyañujob añob b_Λ ti' wenta jini oniyix b_Λ mandar yom i lu' jac'beñob bajche' ts'ijbubil ti mandar. Ma'an majch ch'ujbi i y_Λle' mach'an i mul como junlajal

an lac mul ti lac pejtyelel. Mi quejel lac wersa mel lac b_Λ ya' ba'an Dios.

²⁰ Ma'an majch mi q'uejlel ti tyoj ti Dios cha'an jach i bele' jac'ben jini oniyix b_Λ mandar. Como an jach i c'aj_Λnibal jini mandar tyac cha'an i y_Λq'ueñonla lac ña'tyan cha'an xmulilonla.

An laj coty_Λntyel cha'an mi lac ch'ujbin Cristo

²¹ Dios ch_Λncol i y_Λq'ueñonla lac ña'tyan bajche' ch'ujbi laj q'uejlel ti tyoj ti i wut. Como tsiquil mach ch'ujbi laj q'uejlel ti tyoj cha'an i jac'bentyel i mandar Moisés. Jini ch_Λncol b_Λ i p_Λs'eñonla jiñ_Λch jini tsa' b_Λ i w_Λ tyajle ti t'an ti jini oniyix b_Λ mandar yic'ot jini tsa' b_Λ i w_Λ ts'ijbu jini tsa' b_Λ i xiq'ui y_Λle' Dios ti ñoj oniyix.

²² Dios mi' q'uelonla ti tyoj che' mi lac ch'ujbin cha'an ajcotyaya lac cha'an Jesucristo. Majchical jach mi' ch'ujbin mi q'uejlel ti tyoj como Dios junlajal mi' q'uelonla.

²³ Como ti pejtyelel quixtyañu tsa'ix i lu' cha'leyob mulil. Ma'an majch mi q'uejlel ti ñuc ti Dios.

²⁴ Pero Dios cha'an ti i yutslel i pusic'al ti ma-jtyan jach mi' q'uelob ti tyoj quixtyañujob. Ti coty_Λntiyob ti Cristo Jesús.

²⁵ Dios ti' wa'choco Cristo cha'an i bec i ch'ich'el ti cruz cha'an i xot'ben i mul majchical jach mi' ch'ujbin ti' pusic'al. Cha'an ti y_Λc'Λ ti sajtyel Cristo cha'an i mul ti pejtyelel quixtyañujob, Dios ti' tsic-tis_Λ cha'an tyoj_Λch bajche' mi' cha'len.

²⁶ Pero che' ñac ti sajti Cristo ti cruz ti tsictiyi cha'an ñoj tyoj_Λch Dios como ti q'uejli ti tyoj jini oniyix b_Λ quixtyañujob pero mi' q'uel ti tyoj wale

iliyi je'el majchical jach mi' ch'ujbin ajcotyayajach i cha'an Jesús.

²⁷ ¿Bajche' ch'ujbi i chan isañob i b_Λ quixtyañujob che' jini? Mach ch'ujbi. ¿Chucoch mach ch'ujbi? Como mi ch'ujbiyach laj q'uejlel ti tyoj cha'an ts'acal ti lac lu' jac'be i mandar Moisés, an jini mu' b_Λ i chan isan i b_Λ ti caj, che' jini. Pero mach saj ch'ujbi i chan isañob i b_Λ como mach'an mi laj q'uejlel ti tyoj cha'an ti lac ch'ujbi mu' b_Λ i xic'onla jini mandar pero cha'an ti lac ch'ujbi Cristo ti lac pusic'al.

²⁸ Tsiquilach, che' jini, mi q'uejlel ti tyoj ti Dios quixtyañu cha'an jach mi' ch'ujbin cha'an ajcotyayajach i cha'añob Cristo. Dios mach'an mi' ch'am ti' wenta mi ti' jac'ayob bajche' ti xiq'uiyob ti mandar o mi mach'an ti' jac'ayob.

²⁹ Ixcu Dios, ¿jim ba i Dios jach israelob? ¿Mach ba jinic i Dios jini mach b_Λ israelobic je'el? Jiñachi. Como Dios, i Diosach israelob yic'ot mach b_Λ israelobic.

³⁰ Como an juntiquil jach Dios. Jiñach jini mu' b_Λ i q'uel ti tyoj majchical jach mi' ch'ujbin Cristo ti' pusic'al, mi israel b_Λ quixtyañu, jiñach jini tsepbil b_Λ i p_Λchalel o mi mach b_Λ israelob jiñach jini mach b_Λ tsepbil b_Λ i p_Λchalel.

³¹ ¿Mu' ba la quisaben i c'ajñibal jini mandar che' jini cha'an ti lac ch'ujbi cha'an Cristo ajcotyayajach lac cha'an? Mach'an. Mi sajlic. Pero mi lac más ña'tyan an i c'ajñibal jini mandar tyac.

4

Bajche' ti' ch'ujbi Dios Abraham

¹ Che' jini, mi quejel la c'ale': ¿Chuquiyas ti' cha'le jini lac yum ti ñoj oniyix Abraham b_Λ i c'aba' cha'an ti q'uejli ti tyoj ti Dios?

² Como mi melel_Λch tsa'iqui q'uejli ti tyoj ti Dios cha'an ch_Λ b_Λ wen ti' cha'le, che' jini ch'ujbiy_Λch i chan isan i b_Λ ti caj. Pero mach ch'ujbi i chan isan i b_Λ ti' tyojlel Dios.

³ Mi y_Λle' ti Ts'ijbubil b_Λ i T'an Dios bajche' ti q'uejli ti tyoj Abraham. Mi y_Λl: Abraham ti' ch'ujbi cha'an melel_Λch mi yujtyel ti pejtyelel jini tsa' b_Λ i w_Λ al_Λ Dios. Jas_Λl ti yubi Dios cha'an mi' q'uele' ti tyoj. Ch_Λ'_Λch mi y_Λle' ti Ts'ijbubil b_Λ i T'an Dios.

⁴ Che' an majch mi' cha'len toñel mi y_Λq'uentyel i tyojol cha'an jini tsa' b_Λ i cha'le. Mach'an mi y_Λq'uentyel che' bajche' mi i majtyan jach, pero mi y_Λq'uentyel che' bajche' yoque i tyojol tsa' b_Λ i ganari.

⁵ Pero ma'an ch_Λ b_Λ ch'ujbi lac saj cha'len mu' b_Λ i y_Λq'uen Dios i q'uelonla ti tyoj. Pero mi' q'uelonla ti tyoj che' mi lac ch'ujbin cha'an melel_Λch tsa' b_Λ i y_Λl_Λ Dios. Como Dios b_Λ yi mi' q'uel ti tyoj xmulilob mu' b_Λ i ch'ujbin.

⁶ Jini lac yum ti ñoj oniyix David b_Λ i c'aba' ti y_Λl_Λ bajche' an c'ajacña b_Λ i yoj jini quixtyañu mu' b_Λ i q'uejlel ti tyoj ti Dios che' mach'an ch_Λ b_Λ ch'ujbi i bajñel cha'len mu' b_Λ i y_Λq'uen Dios i q'uele' ti tyoj.

⁷ David ti y_Λl_Λ:
C'ajacña i yoj jini quixtyañu ñus_Λbilix b_Λ i simaron-
lel, jini y_Λp_Λbilix b_Λ i mul ti Dios.

⁸ C'ajacña i yoj jini quixtyañu mach b_Λ ba'an mi
q'uejlel ti xmulil ti lac Yum.
Che' ti y_Λl_Λ David.

9 Ixcu jini tijicñiyel, ¿jini jach ba mi y^Λq'uentyelob jini tsepbil b^Λ i p^Λch^Λlel ma' w^Λ, o jim ba i cha'an je'el jini mach b^Λ tsepbil i p^Λch^Λlel? Ixcu jini Abraham, tsa'ix la c^Λl^Λ cha'an ti q'uejli ti tyoj ti Dios cha'an ti' ch'ujbi melel^Λch mi yujtyel tsa' b^Λ subenti ti Dios.

10 Pero che' ñac ti q'uejli ti tyoj ti Dios jini Abraham, ¿tsepbilix ba i p^Λch^Λlel o max tyo tsepbilic? Ti q'uejli ti tyoj ti Dios che' max tyo tsepbil i p^Λch^Λlel.

11 Ti wi'il tyo ti tsepbenti i p^Λch^Λlel Abraham cha'an i sellojlel ti' b^Λc'tyal cha'an tsa'ix q'uejli ti tyoj ti Dios che' ñac max tyo tsepbil i p^Λch^Λlel cha'an ti' ch'ujbi cha'an melel^Λch tsa' b^Λ subenti ti Dios. Jin cha'an ti ochi Abraham ti i tyat yubil, ti pejtyelelob mu' b^Λ i ch'ujbiñob cha'an melel^Λch mu' b^Λ i y^Λl Dios, aunque ma'an ti tsepbentiyob i p^Λch^Λlel. Lajal bajche' Abraham, mi q'uejlelob ti tyoj ti Dios je'el.

12 Abraham i tyaty^Λch jini israelob tsa'ix b^Λ tsepbentiyob i p^Λch^Λlel. Pero mach cha'an jach ti tsepbentiyob i p^Λch^Λlel pero cha'an ti' ch'ujbiyob melel^Λch tsa' b^Λ i y^Λl^Λ Dios che' bajche' ti' ch'ujbi Dios Abraham che' ñac max tyo ti tsepbenti i p^Λch^Λlel.

Dios mi y^Λq'ueñonla jini tsa' b^Λ i w^Λ al^Λ che' mi lac ch'ujbin

13 Dios ti' w^Λ sube Abraham yic'ot i jiñ^Λjlel cha'an mi y^Λq'uentyelob pañimil ti' wenta. Mach che'ic ti subentiyob cha'an ti caj Abraham ti' ch'ujbi jini mandar tyac, pero cha'an ti' ch'ujbi cha'an melel^Λch mi yujtyel ti pejtyelel tsa' b^Λ i subenti ti Dios. Che' jini ti q'uejli ti tyoj ti Dios.

14 Mi jini jach mi y^Λq'uentyelob pañimil ti' wenta jini mu' b^Λ i ch'ujbiñob jini mandar tyac, lolom jach i ch'ujbintyel Dios, che' jini. Mi che'iqui, ma'an sajlic i c'^Λjñibal jini tsa' b^Λ i w^Λ al^Λ Dios.

15 Como jini mandar muc' jach i sub an xot'mulil cha'an i ñus^Λntyel mandar. Machic an mandar, mach'an i ñus^Λntyel mandar.

16-17 Jin cha'an ti' yutslel i pusic'al, Dios mi quejel i y^Λq'uen pañimil ti' wenta jini tsa' b^Λ i ch'ujbiyob cha'an melel^Λch jini tsa' b^Λ i w^Λ al^Λ Dios. Tsiquil^Λch che' jini, cha'an jini t'an tsa' b^Λ w^Λ subenti Abraham xuc'ul^Λch cha'an i jiñ^Λjlel Abraham je'el. Mach cha'anic jach i jiñ^Λjlel mu' b^Λ i ch'ujbiben i mandar Moisés, pero cha'an je'el jini mu' b^Λ i ch'ujbin cha'an melel^Λch i t'an Dios lajal bajche' ti' ch'ujbi Abraham. Como Abraham ti ochi ti lac tyat yubil, ya' ti' tyojlel Dios tsa' b^Λ i ch'ujbi. Ti Ts'ijbubil b^Λ i T'an Dios mi y^Λle': Tsa'ix cots^Λyet ti i tyat ti' tyojlel yonlel quixtyañujob ti cab^Λl pañimil tyac. Che' ts'ijbubil. Jiñ^Λch b^Λ Dios mu' b^Λ i cuxtisan sajtyemo' b^Λ, mu' b^Λ i mel ti' p'^Λty^Λlel jach b^Λ i t'an jini tsiquil tyac b^Λ max tyo b^Λ ba'an ti yamb^Λ ora.

18 Aunque ma'an tsiquil ti' wut Abraham bajche' mi quej i ts'^Λctiyel jini t'an tsa' b^Λ w^Λ subenti ti Dios, ti' bej ch'ujbi ti i xuc'ty^Λlel i pusic'al cha'an mi quejel i yochel ti tyat i yonlel quixtyañujob ti cab^Λl pañimil tyac bajche' ti w^Λ subenti ti Dios. Como ti w^Λ subenti: Ch^Λ'^Λch mi quejel i yajñel i yonlel a jiñ^Λjlelob. Che' y^Λlol.

19 Pero Abraham ma'an ti' saj c^Λy^Λ i ch'ujbin cha'an mi yujtyel jini tsa' b^Λ w^Λ subenti ti Dios, aunque ti' ña'ty^Λ ma'ix i p'^Λty^Λlel cha'an mi ty^Λlel

i yalobilob yic'ot i yijñam como yomox i tyaj cien año i jabilelob.

²⁰ Pero wen xuc'ul ti' bej ch'ujbi jini t'an tsa' b_Λ w_Λ subenti ti Dios. Ma'an ti' saj c_Λy_Λ i ch'ujbin pero ti' más xuc'choco i pusic'al ti Dios. Ti' subu i ñuclél Dios.

²¹ Ti jump'ej i pusic'al ti' ch'ujbi cha'an an i p'_Λty_Λlel Dios cha'an i cha'len ti pejtyeél jini tsa' b_Λ i w_Λ al_Λ mi quejel i cha'len.

²² Jin cha'an ti q'uejli ti tyoj ti Dios cha'an jach ti' ch'ujbi.

²³ Mach cha'anic jach Abraham ti ts'ijbunti ili t'an ba' mi y_Λl cha'an ti q'uejli ti tyoj cha'an ti' ch'ujbi meél mi yujtyel bajche' ti w_Λ al_Λ Dios.

²⁴ Pero ti ts'ijbunti cha'añonla je'el. Como che' mi lac ch'ujbin Dios tsa' b_Λ tyeche loq'uel lac Yum Jesús ba'an sajtyemo' b_Λ, mux laj q'uejlel ti tyoj ti Dios je'el.

²⁵ Como Dios ti y_Λc'_Λ ti ts_Λns_Λntyel lac Yum Jesús cha'an i xot'beñonla lac mul. Ti cha' tyejchi loq'uel ba'an sajtyemo' b_Λ cha'an ch'ujbi laj q'uejlel ti tyoj ti Dios.

5

Jini mu' b_Λ la c_Λq'uentyel che' mi laj q'uejlel ti tyoj

¹ Cha'an ti lac ch'ujbi cha'an Cristo mi' cotyañonla tsa'ix q'uejliyonla ti tyoj ti Dios. Jin cha'an tsa'ix utsis_Λbentiyonla lac pusic'al yic'ot Dios cha'an ti lac Yum Jesucristo.

² Ochemonixla ti i yutslel i pusic'al Dios cha'an ti lac ch'ujbi cha'an Cristo mi' cotyañonla. Mi lac xuc'chocon lac b_Λ ti i yutslel i pusic'al Dios. Tijicñayonla cha'an la cujil isujm mi quejel la

caq'uentyel i ñuclél Dios mu' b_Λ quej i tsictiyel ti lac tyojlel.

³ Mach jinic jach tijicñayonla cha'an jini ch_Λncol b_Λ lac pijtyan, pero tijicñayonla je'el cha'an lac wocol como la cujil isujm che' an lac wocol mi' p'Λty_Λlitisan lac pusic'al cha'an mi lac más cuche' ti wen.

⁴ Che' mi laj cuche' ti wen lac wocol mi' xuc'chocobeñonla lac pusic'al. Che' xuc'ul lac pusic'al tijicñayonla mi lac pijtyan jini mu' b_Λ i y_Λq'ueñonla Dios.

⁵ Che' mi lac pijtyan jini mu' b_Λ i y_Λq'ueñonla Dios, mach lolom mi lac pijtyan. Díos ti' c'Λñ_Λ Ch'ujul b_Λ i Ch'ujlel tsa' b_Λ i y_Λq'ueyonla cha'an i but'beñonla lac pusic'al ti i p'untyaya Dios cha'añonla.

⁶ Pero che' ñac mach ch'ujbi lac bajñel cotyan lac b_Λ che' ti yoque i yorojlel tsa' b_Λ i w_Λ yajc_Λ Dios, Cristo ti sajti ti cruz cha'an xmulilob.

⁷ Casi ma'an majch mu' b_Λ i y_Λlol y_Λc' i b_Λ ti sajtyel cha'an yamb_Λ quixtyañu aunque tyoj b_Λ quixtyañu. Pero c'o'ojl an jini mach'Λ saj yujil b_Λq'uen mu' b_Λ i y_Λc' i b_Λ ti sajtyel cha'an juntiquil ñoj uts b_Λ quixtyañu.

⁸ Pero Dios mi' p_Λs'eñonla cha'an mi' p'untyañonla como ti sajti Cristo cha'añonla che' ñac xmulilon tyo la.

⁹ Wale, cha'an mi laj q'uejlel ti tyoj ti Dios cha'an ti caj ti sajti Cristo cha'añonla, más tyo melel mi quej i cotyañonla Cristo cha'an mach'an mi quejel lac majlel ti xot'mulil.

¹⁰ Che' ñac ch_Λncol tyo laj contrajin Dios, ti yutsis_Λbeyonla lac pusic'al la quic'ot cha'an ti caj

ti sajti i Yalobil cha'añonla. Wale, che' jini, che' utsonixla la quic'ot Dios más tyo melem an laj coty^Λntyel cha'an cha' cuxul Cristo.

¹¹ Mach jinic jach jini, pero tijicñayonla je'el cha'an lac Dios^Λch cha'an ti sajti lac Yum Jesucristo cha'añonla. Como Cristo ti yutsis^Λ lac pusic'al yic'ot Dios.

Adán yic'ot Cristo

¹² Ti ñaxan an juntiquil jach b^Λ winic Adán b^Λ i c'aba' tsa' b^Λ i cha'le mulil. Cha'an ti caj mulil ti queji i sajtyel quixtyañujob. Wale ti pejtyelelob mi sajtyelob como ti pejtyelelob mi' cha'leñob mulil.

¹³ Che' ñac max tyo ba'an ts'ijubil b^Λ mandar, anix mulil ti mulawil. Pero che' ñac max tyo ba'an ti aq'uenti mandar, max tyo ti ajli mi an i mul quixtyañujob.

¹⁴ Pero c'^{ΛΛ} che' ñac wa' an ti mulawil jini ñaxan b^Λ winic Adán b^Λ i c'aba', c'^{ΛΛ} jintyo w^Λ an ti mulawil Moisés, ti lu' sajtiyob xmulilob, aunque mach junlajal i mul bajche' Adán tsa' b^Λ i ñus^Λbe i tic'oñel Dios. Cha'an ti caj ch^Λ b^Λ ti' cha'le Adán ti ochiyonla ti xmulil. Cha'an ch^Λ b^Λ ti' cha'le Cristo, ti' loc's^Λyonla ti xmulil che' ti ty^Λli w^Λ ti mulawil.

¹⁵ Pero mach ch'ujbi lac saj laje' jini tsa' b^Λ i cha'le Adán yic'ot jini lac majtyan mu' b^Λ i y^Λq'ueñonla Dios. Como cha'an ti caj i mul jini juntiquil winic Adán b^Λ i c'aba' cab^Λlob ti sajtiyob. Pero jini laj coty^Λntyel mu' b^Λ i y^Λq'ueñonla Dios ti lac majtyan jach cha'an ti yutslel i pusic'al, ti aq'uentiyob i yonlelob cha'an ti jini juntiquil winic Jesucristo. Jini tsa' b^Λ i cha'le Cristo jiñ^Λch cha'an i wenlel ti yonlelob.

¹⁶ Mach ch'ujbi lac saj laje' i mul jini juntiquil winic Adán b_Λ i c'aba' yic'ot jini laj coty_Λntyel mu' b_Λ i y_Λq'ueñonla Dios. Como cha'an ti caj jini tsa' b_Λ i cha'le jini juntiquil ti w_Λ ajli cha'an mi quejel i xot'e' i mul quixtyañu. Pero mach che'iqui cha'an laj coty_Λntyel. Como ti majtyan jach Dios mi' q'uelob ti tyoj winicob aunque ti' cha'leyob cab_Λl mulil.

¹⁷ Cha'an ti' mul juntiquil winic mi wersa sajtyel quixtyañujob. Pero cha'an ti cab_Λl i yutslel i pusic'al Dios, ti juntiquil je'el, jiñ_Λch Jesucristo, mi quejel i y_Λq'uentyel tsiji' b_Λ i cuxty_Λlel ti' majtyan jach majchical yom i ch'ame'. Mi q'uejlelob ti tyoj ti Dios.

¹⁸ Cha'an ti' mul jini juntiquil, jiñ_Λch Adán, ti w_Λ ajli cha'an mi quejel i xot'e' i mul ti pejtyelel quixtyañujob. Che' je'el cha'an ti' tyoj b_Λ i cha'libal juntiquil, jiñ_Λch Jesucristo, mi cojlelob ti xot'mulil cha'an i y_Λq'uentyelob tsiji' b_Λ i cuxty_Λlel.

¹⁹ Che' bajche' ti q'uejliyob ti xmulil cab_Λlob cha'an ti juntiquil jach winic tsa' b_Λ i ñus_Λbe bajche' ti subenti ti Dios, che' je'el cab_Λl mi quejel i q'uejlel ti tyoj ti Dios cha'an jini yamb_Λ juntiquil winic tsa' b_Λ i jac'Λ bajche' ti subenti ti Dios.

²⁰ Ti ts'ijbunti jini mandar cha'an mi lac más ña'tyan añ_Λch lac mul. Pero che' ñac ti lac más ña'ty_Λ an cab_Λl lac mul ti queji lac ña'tyan más on tyo i yutslel Dios.

²¹ Che' bajche' mulil ti' wersa y_Λc'Λ ti sajtyel quixtyañujob, che' bajche' jini che' Dios mi' q'uelonla ti tyoj ti yutslel i pusic'al mi y_Λq'ueñonla laj cuxty_Λlel mach'Λ yujil jilel cha'an ti lac Yum Jesucristo.

6

Mi laj cojlel loq'uel ti' p'atyalel mulil

¹ ¿ChΛ bΛ yom mi lac cha'len, che' jini? ¿Yom ba mi lac bej cha'len mulil cha'an Dios mi' más pΛs'eñonla i yutslel i pusic'al?

² Mach'an. Mi sajlic. Sajtyemonixla yubil cha'an ma'ix mi lac bej jaq'ue' mulil. ¿Bajche' ch'ujbi lac bej cha'len mulil, che' jini?

³ ¿Mach ba la' wujil isujm cha'an ti lac pej-tyelel tsa' bΛ lac ch'ΛmΛ ja' mi la cajñel la quic'ot Cristo? Cha'an ti sajti Cristo cha'añonla, che' bajche' chΛncol lac cΛc' lac bΛ ti sajtyel la quic'ot yubil che' mi lac ch'Λme' ja'.

⁴ Ti sajtiyonla yubil. Cha'an ti lac ch'ΛmΛ ja' che' bajche' ti mujquiyonla la quic'ot Cristo yubil. Jin cha'an che' bajche' ti tyejchi loq'uel Cristo ba'an sajtyemo' bΛ cha'an ti' ñuclel Dios lac Tyat, che' joñonla je'el ti tyejchiyonla yubil cha'an ch'ujbi la cajñel ti tsiji' bΛ laj cuxtyalel.

⁵ Como mi añonla ti Cristo cha'an ti sajtiyonla yubil che' bajche' ti sajti Cristo, mi lac tyejchel ti tsiji' bΛ laj cuxtyalel je'el che' bajche' ti tyejchi Cristo.

⁶ Como che' ñac ti' bajle ti cruz Cristo che' bajche' ya' ti bajle tsucul bΛ lac pusic'al yic'ot je'el cha'an i jisΛntyel i simaronlel lac pusic'al cha'an ma'ix bej chuculonla ti' p'atyalel mulil.

⁷ Como che' an majch mi sajtyel, tsa'ix cojli ti' p'atyalel mulil.

⁸ Mi ti sajtiyonla la quic'ot Cristo, la cujil isujm mi quejel lac cha' cuxtiyel la quic'ot je'el.

⁹ Como la cujil isujm cha'an ti cha' tyejchi loq'uel Cristo ba'an sajtyemo' b_Λ, ma'an ba' b_Λ ora mi quejel i cha' sajtyel. Mach ch'ujbi i cha' sajtyel.

¹⁰ Como che' ñac ti sajti Cristo jas_Λ junyajlel ti sajti cha'an i lu' xot'beñob i mul quixtyañujob. Pero wale cha' cuxulix cha'an mi' tsictisan i ñuclel Dios.

¹¹ Jatyetla, je'el, ña'tyanla che' bajche' sajtyemetixla cha'an mach'an mi' nijc_Λbeñetla la' pusic'al mulil. Pero ña'tyanla che' bajche' cha' cuxuletlā cha'an mi' la' tsictisan i ñuclel Dios, como tyem añonla la quic'ot lac Yum Cristo Jesús.

¹² Jin cha'an, che' w_Λ tyo añonla ti mulawil mach yom mi lac saj c_Λc' lac pusic'al i yotsañonla ti mulil. Como mulil mi' jop' i wersa nijc_Λbeñonla lac jaq'ue' i tsuculel lac pusic'al.

¹³ Mach yom mi la c_Λc' lac b_Λc'tyal i cha'len mulil. Pero jini yom b_Λ, jiñ_Λch cha'an la c_Λc' lac b_Λ ti Dios. Como tsa'ix sajtiyonla la quic'ot Cristo yubil. Wale anix tsiji' b_Λ laj cuxty_Λlel. Yom mi la c_Λc' lac b_Λ ti Dios cha'an i c'añonla lac cha'len wen b_Λ lac cha'libal.

¹⁴ Como mach ch'ujbi i bej y_Λsañonla mulil como wale ma'ix añonla ti' wenta jini oniyix b_Λ mandar pero añonla ti' wenta i yutslel i pusic'al Dios.

Lajoñel cha'an ch_Λ b_Λ mi lac yumin

¹⁵ ¿Bajche' ma' pensalin che' jini? ¿Yom ba mi lac cha'len mulil che' ma'ix bej añonla ti' wenta oniyix b_Λ mandar pero añonixla ti' wenta i yutslel i pusic'al Dios? Mach'an. Mi sajlic.

¹⁶ Como wen la' wujil isujm che' mi la c_Λc' lac b_Λ ti' wenta juntiquil yum_Λ, i winiconla jini yum_Λ che' jini. Wersa mi lac jaq'ue' ch_Λ b_Λ mi' xic'onla lac cha'len. Che' bajche' jini, che' mi la c_Λc' lac b_Λ

cha'an mi lac yumin mulil, wersa mi lac xot'e' lac mul che' mi lac sajtyel. Che' mi la cAc' lac bA cha'an mi lac yumin Dios, mi yAq'ueñonla la cajñel ti tyoj.

¹⁷ Ti wajali ti la' wAc' la' bA la' yumin mulil. Pero wale, wocox i yAA Dios tsa'ix la' ch'ujbibe ti jump'ej la' pusic'al i cAntisA tsa' bA aq'uentiyetla ti Dios.

¹⁸ Wale tsa'ix cojliyetla ti mulil tsa' bA la' yumi. Tsa'ix ochiyetla ti i winiquetla Dios cha'an mi la' cha'len chA bA tyoj ti' wut.

¹⁹ (ChAncol c subeñetla jini t'an ti lajoñel tyac como mero wocol mi la' ch'Am'en isujm.) Che' lajal bajche' ti wajali ti la' wAc' la' bA cha'an mi la' cha'len ba'ical bA la' tsuculel yic'ot la' simaronlel jintyo ma'ix i p'isol la' simaronlel. Wale, che' jini, yom mi la' wAc' la' bA cha'an mi la' cha'len chA bA tyoj ti' wut Dios cha'an mi la' wajñel ti i cha'añetla Dios ti junyajlel.

²⁰ Como che' ñac chAncol tyo la' wAc' la' bA la' yumin mulil mach libre añetla cha'an mi la' cha'len chA bA tyoj.

²¹ ¿ChA bA yes i c'Anibal jini tsa' bA la' cha'le wajali mu' bA la' quisnin la' cha' pensalin? Ma'ix sajlic i c'Anibal. Che' jach mi yAc'onla ti xot'mulil che' mi lac sajtyel.

²² Pero wale tsa'ix colbentiyetla ti i p'AtyAlel mulil. Ti ochiyetla ti i winic Dios. Mi la' wochel ti i cha'añet bA la Dios. Mi quejel la' wAq'uentiyel la' cuxtyAlel mach'A yujil jilel.

²³ I tyojol lac mul jiñach che' mi quejel lac majlel ti xot'mulil che' mi lac sajtyel, pero lac majtyan mu' bA i yAq'ueñonla Dios jiñach laj cuxtyAlel mach'A yujil jilel che' mi la cajñel la quic'ot Cristo Jesús lac Yum.

7

Lajoñel cha'an ñujpuñel

¹ Quermañujob, cΛñΛl bΛ la' cha'an jini mandar tyac, la' wujil isujm cha'an añob ti' wenta mandar quixtyañujob che' jach che' cuxulob tyo.

² Che' bajche' che' an i ñoxi'al x'ixic, jini mandar cha'an ñujpuñel mi yΛle' cha'an wersa mi yajñel yic'ot i ñoxi'al che' cuxul tyo i ñoxi'al. Pero mi ti sajti, librejix jini x'ixic. Mach bej an ti' wenta jini mandar.

³ Mi ti ajni yic'ot yambΛ winic che' cuxul tyo i ñoxi'al, i tsuculelΛch mi' cha'len. Pero mi ti sajti i ñoxi'al, mach bej an ti' wenta i mandar ñujpuñel. Mach i tsuculel mi ti' cha'le ñujpuñel yic'ot yambΛ winic.

⁴ Quermañujob, jiñΛch bajche' añetla wajali je'el. La' noxi'alΛch jini mandar tyac yubil como ti la' wersa ch'ujbi jini mandar. Pero ti sajtiyonla yubil cha'an mach'an mi lac jac' jini mandar tyac como che' bajche' ti sajtiyonla yic'ot Cristo che' ñac ti tsΛnsΛnti ti cruz. Mach bej añonla ti' wenta lac wersa ch'ujbin jini mandar tyac. Libre añonla la cajñel yic'ot Cristo tsa' bΛ tyejchi loq'uel ba'an sajtyemo' bΛ. Mi lac ch'ujbiben i t'an. Mi lac cha'len wen bΛ lac cha'libal bajche' yom Dios.

⁵ Ti wajali ti lac cha'le lac simaronlel chΛ bΛ jach bΛ yom lac bajñel pusic'al. Pero cha'an ti lac ña'tyΛ bajche' tiq'uil ti mandar, lac pusic'al ti' más nijcΛbeyonla lac cha'len jini mach bΛ wen. Jini lac simaronlel mi quejel i yΛc'onla ti sajtyel.

⁶ Pero tsa'ix loq'uiyonla ti' wenta jini mandar tsa' bΛ lac yumi. Wale libre añonla. An tsiji' bΛ laj cuxtyΛlel cha'an Ch'ujul bΛ i Ch'ujlel Dios cha'an

mi lac cha'liben i troñel Dios. Ma'an mi lac wersa cha'len bajche' ts'ijbubil ti mandar.

Jini mulil am b_Λ ti lac pusic'al

⁷ ¿Chuquiyes i sujmllel jini tsa' b_Λ c_ΛΛ, che' jini? ¿Mulil ba jini mandar tyac? Mach'an. Mi sajlic. Machic an mandar mach'an ti laj c_Λñ_Λ mulil. Mach'an ti lac ña'ty_Λ mi mulil che' mi lac mul_Λben ch_Λ b_Λ yes an i cha'an lac pi'Λlob machic ti' subu mandar ba' mi y_Λle': Mach a mul_Λben ch_Λ b_Λ yes an i cha'an a pi'Λlob, che'en.

⁸ Che' mi lac c_Λn bajche' tiq'uilonla ti mandar, lac pusic'al mi utsi quejel i wersa mulan i cha'len jini tiq'uil b_Λ. Como che' ñac max tyo ti laj c_Λñ_Λ bajche' mi' tic'onla mach'an tsiquil mulil yubil como mach'an ti lac ña'ty_Λ mi ch_Λncol lac cha'len tiq'uil b_Λ.

⁹ Che' max tyo ubibil lac cha'an mandar, weñ_Λch añonla ti la cubi. Pero che' ñac ti la cubi mandar, ti lac ña'ty_Λ cha'an anix lac mul. Ti queji lac ña'tyan cha'an wersa mi lac xot' lac mul.

¹⁰ Ti ujti, che' jini, cha'an jini mandar tsa' b_Λ aq'uentiyonla cha'an i y_Λq'ueñonla tsiji' b_Λ laj cuxty_Λlel mi ts'Λc_Λl mi lac ch'ujbiben, che' jach ti y_Λq'ueyonla lac xot' lac mul como mach'an ts'Λc_Λl ti lac ch'ujbibe.

¹¹ Como ti y_Λq'ueyonla lac lotin lac b_Λ. Ti lac lolon ña'ty_Λ cha'an ch'ujbi lac lu' jaq'ue' bajche' mi y_Λl mandar. Ti jini jach b_Λ mandar mi' tsic-tis_Λbeñonla cha'an mi y_Λc'onla ti xot'mulil ti caj lac mul.

¹² Jin cha'an, ch'ujul jini mandar como ty_Λlem ba'an Dios. Lajal ch'ujul je'el jujump'ej i tic'oñel am b_Λ ti mandar. Tyoj_Λch. Weñ_Λch.

13 ¿Pero ch'ujbi ba i y^Λc'onla ti xot'mulil jini wen b^Λ mandar? Mach'an. Mi sajlic. Jiñ^Λch mulil mu' b^Λ i y^Λc'onla ti xot'mulil cha'an tsictiyic mulilach. Ti c'^Λjni jini wen b^Λ mandar cha'an mi' tsictisan ñoj bibajax jini lac mul.

14 Como la cujil ty^Λlem jini mandar ti Ch'ujul b^Λ i Ch'ujlel Dios. Pero joñon quixtyañujon jach. Chuculon ti' p'^Λty^Λlel mulil.

15 Mach'an mic ch'^Λmben isujm ch^Λ b^Λ och ch'^Λach mi yujtyel, pero mach'an mic cha'len jini wen b^Λ com b^Λ c cha'len. Pero jini mu' b^Λ c ts'a'q'uel, jiñ^Λch mu' b^Λ c yoque cha'len.

16 Che' jini, che' mic cha'len jini mach'^Λ wen b^Λ mach b^Λ c com cha'len, ch^Λncol c^Λc' c t'an cha'an weñ^Λch jini mandar.

17 Jin cha'an mach joñonic ch^Λncol b^Λ c cha'len jini mu' b^Λ c ts'a'q'uel, pero jiñ^Λch mulil am b^Λ tic pusic'al mi y^Λq'ueñon c cha'len jini mach'^Λ wen b^Λ mach b^Λ com cha'len.

18 Como cujil isujm mach'an ch^Λ b^Λ wen ti bajñel b^Λ c pusic'al. Como com c cha'len ch^Λ b^Λ wen, pero mach ch'ujbi c cha'len.

19 Mach'an mic cha'len jini wem b^Λ com b^Λ c cha'len, pero jini mach'^Λ wen mach b^Λ com c cha'len, jiñ^Λch mu' b^Λ c bej cha'len.

20 Jin cha'an che' mic bej cha'len jini mach b^Λ com c cha'len, mach joñonic ch^Λncol c cha'len, pero jiñ^Λch mulil am b^Λ tic pusic'al mi y^Λq'ueñon c cha'len.

21 Jiñ^Λch bajche' mi yujtyel tic pusic'al mi cubin: Jini mulil am b^Λ tic pusic'al mi' nijc^Λbeñon cha'an che' com c cha'len wen b^Λ, jini jach mi' wersa aq'ueñon c cha'len mach'^Λ wen.

²² Tic pusic'al mic wen mulan i mandar Dios. Ñoj weñach jini mandar mi cubin.

²³ Pero mic ña'tyan an chΛ bΛ an ti bajñel c pusic'al mu' bΛ i yΛq'ueñon j contrajin c bΛ. Jiñach jini mulil am bΛ tic pusic'al tsa' bΛ i wersa chucuyon ti' p'ΛtyΛlel yubil.

²⁴ Pero ñoj p'ump'uñon, che' jini. ¿Majchqui mejl i tic'beñon bajñel c pusic'al cha'an ma'an mi yΛc'on ti xot'mulil?

²⁵ Jin jach Dios ch'ujbi i tic'beñon bajñel yom bΛ c pusic'al cha'an ti lac Yum Jesucristo. Wocox i yΛΛ Dios. Che' jini cujil isujm yom mic ch'ujbin c xic'ol ti Dios. Pero bajñel yom bΛ c pusic'al mi' jop' i xic'on c cha'len mulil.

8

Laj cuxtyΛlel tyΛlem bΛ i Ch'ujul bΛ i Ch'ujlel Dios

¹ Jin cha'an, wale ma'ix xot'mulil cha'an jini año' bΛ ti Cristo Jesús. Mi' cha'leñob bajche' yom Ch'ujul bΛ i Ch'ujlel Dios mach jinic bajche' bajñel yom i pusic'al.

² An i p'ΛtyΛlel Ch'ujul bΛ i Ch'ujlel Dios cha'an i yΛq'ueñonla tsijib bΛ laj cuxtyΛlel. Cha'an año'la ti Cristo Jesús ti' coloyonla ti i p'ΛtyΛlel mulil mu' bΛ i yΛc'onla ti sajtyel.

³ Como mach ch'ujbi i cotyañonla i mandar Moisés como cha'an ti caj i tsuculel lac pusic'al mach saj ch'ujbi lac lu' jac'ben jini mu' bΛ i xic'onla lac cha'len. Pero Dios ch'ujbi i cotyañonla. Ti' choco tyΛlel i Yalobil tsa' bΛ i ch'ΛmΛ i bΛc'tyal che' bajche' quixtyañu jach cha'an i yac' i bΛ i xot'beñonla lac mul. Aunque ti' ch'ΛmΛ i bΛc'tyal che' bajche' quixtyañu jach pero mach'an ti' cha'le

mulil. Dios ti y^Λc'Λ ti sajtyel che' bajche' ts^Λns^Λbil b^Λ i majtyan cha'an i xot'beñonla lac mul. Ch^Λ'Λch ti xojt'i mulil che' bajche' jini che' ñac ti poj ajni che' bajche' quixtyañu jach jini Jesús.

⁴ Ch^Λ'Λch ti' cha'le Dios cha'an i y^Λq'ueñonla lac cha'len tyoj b^Λ bajche ti' xiq'uiyonla ti mandar. Como wale ma'ix mi la cajñel bajche' bajñel yom lac pusic'al pero mi la cajñel bajche' yom Ch'ujul b^Λ i Ch'ujlel Dios am b^Λ ti lac pusic'al.

⁵ Como jini mu' b^Λ i bajñel pensalin bajche' bajñel yom i pusic'al, jin jach mi' pensalin jini mach b^Λ wen i cha'an b^Λ mulawil. Pero jini mu' b^Λ i pensalin bajche' yom Ch'ujul b^Λ i Ch'ujlel Dios mi' pensalin bajche' yom Dios.

⁶ Jini mu' b^Λ i bele' pensalin jini mach b^Λ wen i cha'an jach b^Λ mulawil mi quejel i y^Λq'uentyel i xot' i mul. Jini mu' b^Λ i bele' pensalin ch^Λ b^Λ yom Ch'ujul b^Λ i Ch'ujlel Dios mi quejel i y^Λq'uentyel i cuxty^Λlel mach'Λ yujil jilel yic'ot i ñach'ty^Λlel i pusic'al.

⁷ Jini mu' b^Λ i bele' pensalin mach b^Λ wen i cha'an jach b^Λ mulawil mi' contrajin Dios. Como mach yom i jac'ben bajche' xiq'uil ti i mandar Dios, mach ch'ujbi i jaq'ue' je'el.

⁸ Jin cha'an, jini mu' b^Λ i cha'len bajche' bajñel yom i pusic'al mach ch'ujbi i cha'len jini mu' b^Λ i mulan Dios.

⁹ Pero jatyetla mach'an mi la' wajñel bajche' yom la' pusic'al. Mi la' wajñel bajche' yom Ch'ujul b^Λ i Ch'ujlel Dios ya' b^Λ an la' wic'ot. Jini mach'Λ ba'an Ch'ujul b^Λ Ch'ujlel Cristo yic'ot, mach i cha'anic Cristo.

10 Pero mi an Cristo ti la' pusic'al aunque mi sajtyel la' b^Λc'tyal bajche' i ty^Λlel mi sajtyel cha'an ti caj mulil, pero anix i cuxty^Λlel la' ch'ujlel como tsa'ix i y^Λq'ueyetla tyoj b^Λ la' pusic'al Dios.

11 Mi an la' wic'ot Ch'ujul b^Λ i Ch'ujlel Dios tsa' b^Λ tyeche loq'uel Cristo Jesús ba'an sajtyemo' b^Λ, mi quejel i tyejch isañetla loq'uel ba'an sajtyemo' b^Λ je'el. Mi quejel i y^Λq'uen i cuxty^Λlel lac b^Λc'tyal cha'an ti Ch'ujul b^Λ i Ch'ujlel am b^Λ la quic'ot.

12 Quermañujob, an ti lac wenta ch^Λ b^Λ mi lac cha'len. Mach lac wenta mi lac wersa ajñel bajche' mi' xic'onla lac pusic'al.

13 Como mi ch^Λncol jach la' wajñel bajche' mi' wersa bajñel xiq'uetla la' pusic'al mi quejel la' w^Λq'uentyel xot'mulil. Pero mi ti lac cha'le bajche' mi' xic'onla Ch'ujul b^Λ i Ch'ujlel Dios, cha'an mi laj c^Λye' mulil, che' jini mi quejel la cajñel ti laj cuxty^Λlel mach'^Λ yujil jilel.

14 Ti pejtyelelob mu' b^Λ i tyoj is^Λntyelob majlel ti Ch'ujul b^Λ i Ch'ujlel Dios i yalobilob^Λch Dios.

15 Como jini Ch'ujul b^Λ i Ch'ujlel Dios tsa' b^Λ aq'uentiyonla ti Dios, mach'an mi y^Λq'ueñonla lac cha' b^Λc'ñan xot'mulil bajche' juntiquil ajtroñel mi' b^Λc'ñan simaron b^Λ i yum. Pero mi yotsañonla ti yalobil Dios. Jini Ch'ujul b^Λ i Ch'ujlel Dios mi y^Λq'ueñonla la c^Λl: C Tyat, cho'onla.

16 Ch'ujul b^Λ i Ch'ujlel Dios mi y^Λq'ueñonla lac ña'tyan ti lac pusic'al je'el cha'an i yalobilonla Dios.

17 Cha'an i yalobilonla Dios mi quejel la c^Λq'uentyel ti Dios jini wen b^Λ tsa' b^Λ i w^Λ al^Λ. Lajal bajche' mi y^Λq'uen Cristo ch^Λ'ach mi quejel i y^Λq'ueñonla je'el. Mi ti lac ñu^Λ wocol cha'an ti

caj mi lac tsac̱len majlel Cristo mi quejel lac motin ochel ti' ñucḻel ti panchan la quic'ot.

18 Cujil isujm cha'an mach ch'ujbi lac laje' jini wocol tyac mu' b_Λ lac ñusan ti ili b_Λ ora yic'ot i c'otyajlel i ñucḻel Cristo mu' b_Λ quejel lac p_Λs'entyel ti tyal tyo b_Λ ora.

19 Ti pejtyelel ch_Λ b_Λ ti mejli ti Dios ch_Λncol i wen pijtyan jintyo i yorojlel mi tsictis_Λntyel majchqui i yalobilob Dios.

20 Como ti pejtyel ch_Λ b_Λ an tyac ma'an ti ts'_Λctiyi i c'_Λjnibal bajche' yom, mach cha'an che' ti y_Λlo yajc_Λ, pero cha'an ch_Λ'_Λch yom Dios. Pero tyal i yorojlel mi quejel i ts'_Λctiyel bajche' yom, cha'an ch_Λ'_Λch yom Dios.

21 Pero tyal i yorojlel che' ma'ix mi quejel i sajtyel ti pejtyel ch_Λ b_Λ an, mi jinic mu' b_Λ i colel, ma'ix mi' p_Λc'm_Λl majlel. Ch_Λ'_Λch mi quejel i yujtyel ti jim b_Λ ora che' Dios mi quejel i y_Λq'uen i ñucḻel i yalobilob.

22 La kujil isujm c'_Λl_Λ ti tyejchibal mulawil c'_Λl_Λ wale iliyi, ti pejtyelel i melbal Dios mu' ti ajacniyel. Mi yilan wocol che' bajche' juntiquil x'ixic mu' b_Λ ti bajq'uel.

23 Mach jinic jach pejtyel ch_Λ b_Λ an ti mulawil mi yilan wocol pero ñoj wocol mi la cubin joñonla je'el aunque ti aq'uentiyonla jini ñaxan b_Λ lac majtyan ti Dios, jiñ_Λch Ch'ujul b_Λ i Ch'ujlel Dios. Ch_Λncolonla ti pijt jintyo mi tsictiyel cha'an i yalobilonla Dios che' mi quejel la c_Λq'uentyel tsiji' b_Λ lac b_Λc'tyal.

24 Che' ñac ti coty_Λntiyonla ti queji lac pijtyan jini mu' tyo b_Λ quejel la c_Λq'uentyel. Pero mi ch_Λncol

laj q'uel jini tsa' b_Λ lac pijty_Λ, mach yoque pijtyaya-jic, como ma'ix ch_Λ b_Λ och mi lac bej pijtyan como ch_Λncox laj q'uele'.

²⁵ Pero mi ch_Λncol lac pijtyan jini max tyo b_Λ an mi laj q'uel, ti' xuc'ty_Λlel lac pusic'al yom mi lac wersa bej pijtyan.

²⁶ Che' je'el, che' la com lac cha'len oración Ch'ujul b_Λ i Ch'ujlel Dios mi' cotyañonla che' mach'an mi lac ña'tyan bajche' yom mi lac pejcan Dios. Che' ch_Λncol lac pensalin Dios ti oración pero ma'ix mi loq'uel t'an ti lac ti', jini Ch'ujul b_Λ i Ch'ujlel Dios mi' pejc_Λbeñonla Dios ti oración ti t'an mach b_Λ mejl la c_Λl bajche' com lac pejcan ti oración.

²⁷ Dios mu' b_Λ i c_Λmben i pusic'al quixtyañujob yujil ch_Λ b_Λ ch_Λncol i c'ajtin Ch'ujul b_Λ i Ch'ujlel como Ch'ujul b_Λ i Ch'ujlel Dios mi' c'ajtiben Dios cha'an i cotyan i cha'año' b_Λ bajche' yom i pusic'al Dios.

Mi lac wen ganarin

²⁸ La cujil ti pejtyelel ch_Λ b_Λ jach mi yujtyel, Dios mi' c'añe' cha'an i wenlel jini mu' b_Λ i p'untyañob Dios tsa' b_Λ p_Λjyi bajche' ti' w_Λ ña'ty_Λ Dios i cha'len ti ñoj oniyix.

²⁹ Como che' ñac max tyo ti' mele mulawil Dios ti' w_Λ ña'ty_Λ majchqui mi quejel i yochel ti i yalobilob. Ti' w_Λ yajc_Λ cha'an i yajñel bajche' i yalobil. I Yalobil Dios ti ochi ti ascuñal yubil. Che' jini ti' tyaja cab_Λl i yijts'iñob yubil.

³⁰ Dios ti' p_Λy_Λ cha'an mi yochel ti i cha'an jini tsa' b_Λ i w_Λ yajc_Λ. Ti' q'uele ti tyoj jini p_Λy_Λbilo' b_Λ i cha'an. Tyal i yorojlel jini tsa' b_Λ q'uejli ti tyoj

mi quejel i yΛq'uentyelob i ñuclel bajche' i Yalobil Dios.

³¹ ¿Chuqui yom mi la cΛl, che' jini? Che' DiosΛch am bΛ la quic'ot cha'an i cotyañonla, ¿majchqui ch'ujbi i yΛsiñonla che' jini? Ma'an majch.

³² Dios mach'an ti' cotyΛ cha'an mach'an mi sajtyel i Yalobil, pero ti yΛc'Λ ti tsΛnsΛntyel cha'an ti lac pejtyelel. Mi ti yΛq'ueyonla i Yalobil, ¿mach ba muq'uic i yΛq'ueñonla ti pejtyel chΛ bΛ tyac yom? Muc'Λch.

³³ ¿Majchqui ch'ujbi i jop'ben i mul jini yajcΛbilo' bΛ i cha'an ya' ti tyojlel Dios? Ma'an majch. Como jiñΛch Dios mu' bΛ i q'uelob ti tyoj.

³⁴ ¿Majchqui ch'ujbi i yΛl cha'an wersa mi la xot' lac mul? Ma'an majch. Cristo ti sajti cha'an i xot'beñonla lac mul. Ti tyejchi loq'uel ba'an sajtyemo' bΛ. Wale ya'an ti' ñoj Dios ba' mi' pejcΛbeñonla Dios.

³⁵ ¿Am ba chΛ bΛ ch'ujbi i quipañonla loq'uel ba'an Cristo cha'an i cΛy i p'untyañonla? Mach'an. ¿Ixcu mi an ba lac wocol, mi pensal, mi tyΛc'Λntyel, mi wi'ñal, mi ma'ix lac pislél, mi an bΛbΛq'uen bΛ, mi bΛq'uentic mi lac tsΛnsΛntyel? Mach'an chΛ bΛ mi yΛq'uen Dios i cΛy i p'untyañonla.

³⁶ Como ti Ts'ijbubil bΛ i T'an Dios mi yale':
 Cha'an ti caj mi lojon c ch'ujbiñet an yom bΛ i tsansañon lojon c'ΛΛ mi ñumel q'uín.
 Cho'on jach lojon bajche' tiñame' cha'an mic tsΛnsΛntyel lojon mi' lolon cha'leñob.
 ChΛΛch ts'ijbubil.

³⁷ Pero aunque an cabΛl lac wocol mi lac wen ganarin ti Cristo mu' bΛ i p'untyañonla.

38-39 Jin cha'an ch'ujbi lac junyajlel ña'tyan cha'an mach'an sajlic ch_Λ b_Λ ch'ujbi i quipañoñla loq'uel ba'an Dios cha'an i c_Λy i p'untyañoñla. Mi ti ts_Λnsantiyonla, mi cuxulon tyo la mi' p'untyañoñla. Mi ajtroñelobic i cha'an Dios ch'oyolob ti panchan ch'ujbi i y_Λq'uen i c_Λy Dios i p'untyañoñla. Mi xibajic, mi yajtroñelobic i cha'an xiba, mi ch_Λ b_Λ tyaquic an wale, mi jinic tyo mu' b_Λ yujtyel ti tyal tyo b_Λ ora, mi ch_Λ b_Λ tyaquic jach an ti panchan mi an ti mulawil, mach'an sajlic i melbal b_Λ Dios ch'ujbi b_Λ i quipañoñla loq'uel ba'an Dios tsa' b_Λ i p_Λs'eyonla ti lac Yum Jesucristo bajche' c'amel mi' p'untyañoñla.

9

Dios ti yajc_Λ israelob

¹ Cha'an i cha'añoñ Cristo ñoj melel_Λch jini mu' b_Λ c subeñetla. Mach'an mic cha'len lot. C_Λntis_Λbilon ti Ch'ujul b_Λ i ch'ujlel Dios am b_Λ tic pusic'al. Cha'an lajal mi' cha'len t'an c pusic'al bajche' c ti' cujil cha'an melel_Λch jini c t'an.

² Ñoj ch'_Λjyem c pusic'al. C'ux mi cubin tic pusic'al ti pejtyel ora como mach yom i ch'ujbin Cristo jini c pi'_Λlob israelob.

³ Muq'uic i coty_Λntyel c pi'_Λlob israelob mi ti c_Λc'_Λ c b_Λ ti xot'mulil, mi ch'ujbiyic c chojquel ti' tyojlel Cristo ch'_Λch mic cha'len como wersa com mi coty_Λntyelob como jiñ_Λch yoque c pi'_Λlob yubil como junlajal lojon c yum ti ñoj oniyix.

⁴ I jiñ_Λjlelob Israel. Dios ti' p_Λy_Λyob cha'an mi yotsañob ti yalobilob. Ti tsictiyi i c'otyajlel i ñucllel Dios ti i tyojlelob. Ti y_Λq'ueyob trato b_Λ t'an yic'ot

i mandar Moisés. Ti cAntisAntiyob bajche' yom i ch'ujutisañob Dios. Ti' wΛ subeyob cha'an mu' bΛ i yΛq'ueñob ti tyal tyo bΛ ora jini wΛ albil bΛ i cha'an Dios.

⁵ Israelob i jiñΛjlel cojax tyo bΛ lojon c yum Abraham. Che' ñac ti' ch'ΛmΛ i bΛc'tyal Cristo, loq'uem je'el ba'an israelob. DiosΛch Cristo. An ti' wenta ti pejtyelel chΛ bΛ tyac jach an. La' subjic i ñucllel ti bele' ora. Amén.

⁶ Mach ch'ujbi la cΛl cha'an ma'ix ti ts'Actiyi jini wΛ albil bΛ t'an tsa' bΛ yΛq'ueyob israelob Dios. Pero mach lu' i cha'añob Dios ti pejtyelelob i jiñΛjlelob Israel.

⁷ Mach ti pejtyelel i jiñΛjlelob Abraham mi quejel i yajñel che' bajche' yoque i jiñΛjlelob. Pero Dios ti' wΛ sube: I yalobilob Isaac mi quejel i yochelob ti yoque a jiñΛjlelob. Che' ti subenti Abraham.

⁸ Jini mi yΛq'ueñonla lac ña'tyan cha'an ma'an mi yajñel ti i yalobil Dios cha'an jach yajcΛbil ti Dios Abraham i yumob ti ñoj oniyix. Pero jini jach mi yajñel ti yalobilob Dios jini mu' bΛ i ch'ujbiñob cha'an melelΛch jini wΛ albil bΛ t'an tsa' bΛ i sube Abraham Dios.

⁹ JiñΛch jini wΛ albil bΛ t'an tsa' bΛ i sube Abraham Dios. Ti yΛΛ: Ti wΛ ña'tyΛbil bΛ ora mi quejel c pΛs c p'ΛtyΛlel. Mi quejel i ch'oc an alo' bΛ i yalobil Sara. Che' ti subenti Abraham.

¹⁰ Mach jinic jach jini pero an yambΛ tsa' bΛ ujti je'el. Ti ñumi ora. I yalobil Sara, lac yum bΛ ti ñoj oniyix Isaac bΛ i c'aba' ti coli. Ti' pΛyΛ yijñam Rebeca bΛ i c'aba'. Ti' ch'ocΛ lut bΛ i yalobil.

¹¹⁻¹³ Pero che' ñac max tyo ch'ocayob, che' max tyo ti' cha'leyob mi chΛ bΛ wen mi chΛ bΛ mach'Λ

wen, Dios ti' w_Λ sube Rebeca: Jini ascuñal b_Λ mi quejel i cha'liben i toñel jini ijts'íñal b_Λ, che'en. Jini mi' loq'uel bajche' an ti Ts'ijbubil b_Λ i T'an Dios ba' Dios ti w_Λ al_Λ: Mic p'untyan Jacob pero Esaú ma'ix mic ñoj p'untyan, che'en. Ch_Λ'ach ts'ijbubil. Cha'an ch_Λ'ach an ti' t'an Dios, tsiquil_Λch, che' jini, cha'an Dios cha'an jach ti w_Λ ña'ty_Λ ch_Λ'ach yom i cha'len, mi' yajcan ba' b_Λ yom i p_Λye' cha'an mi yochel ti i cha'an b_Λ. Mach'an mi yajc_Λntyel cha'an ti caj bajche' mi' cha'len pero cha'an ch_Λ'ach yom i pusic'al Dios.

¹⁴ ¿Ch_Λ b_Λ yom mi la c_Λl che' jini? ¿Mu' ba la c_Λle' cha'an mach'an tyoj Dios che' mi' p'untyan juntiquil, pero ma'an mi' ñoj p'untyan yamb_Λ? Mach che' yom mi la c_Λle'.

¹⁵ Como Dios ti' sube Moisés: Mi quej c p'untyan jini com b_Λ c p'untyan. Mi quej c p_Λs'en i yutslel c pusic'al jini com b_Λ c p_Λs'en, che'en.

¹⁶ Tsiquil, che' jini, mi p'unty_Λntyel quixtyañu mach cha'an che' yom i pusic'al quixtyañu, mi cha'anic ch_Λncol i wersa sajcan i p'unty_Λntyel. Mi p'unty_Λntyel cha'an jach Dios ti w_Λ yajc_Λ majchqui yom i p'untyan.

¹⁷ Ti Ts'ijbubil b_Λ i T'an Dios mi y_Λl cha'an Dios ti' sube jini ñuc b_Λ yum_Λl ya' ti pañimil Egipto b_Λ i c'aba'. Ti y_Λl_Λ: Tic wa'chocoyet ti ñuc b_Λ yum_Λl cha'an jach mic p_Λs c p'_Λty_Λlel ti a tyojlel, cha'an mi pujquel majlel j c'aba' ti pejtyelel mulawil. Che' ti y_Λl_Λ Dios.

¹⁸ Tsiquil, che' jini, Dios mi' p'untyan majchqui jach yom i p'untyan, yic'ot mi y_Λq'uen i tsats an i pusic'al majchqui jach yom i tsats an.

19 Pero mi chΛ'ach an bajche' jini, mi quejel a c'ajtibeyon: ¿Chucoch mi' bele' al Dios añΛch i mul quixtyañu, che' jini? ¿Majchqui ch'ujbi i contrajin chΛ bΛ yom Dios? che'etla mi quejel la' c'ajtibeñon.

20 Pero jatyetla, quixtyañujet jach la. ¿Majchetqui che' jini cha'an ma' letsan a t'an ti' contra Dios? Ixcu jini p'ejt, ¿yom ba i suben xmel p'ejt: ¿Chucoch chΛ'ach ti a meleyon? che'en.

21 Pero jini xmel p'ejt ch'ujbiyΛch i c'Λn jini oc'ol chΛ'ach bajche' yom. Ti junc'ojl oc'ol mi' mel cha'p'ej p'ejt, jump'ej mu' bΛ i c'Λjñel ti ñuc bΛ i c'Λjnibal, yambΛ mu' bΛ i c'Λjñel cha'an mach'Λ ñoj an i c'Λjnibal.

22 ¿Chuqui, che' jini? Dios, aunque yom i pas i mich'lel yic'ot i p'ΛtyΛlel, jal ti' cuchbeyob i mul quixtyañujob tsa' bΛ tyejchbeyob i mich'lel. C'Λjnibal jach ili quixtyañujob cha'an mi jisΛntyel.

23 Wen jal ti' cuchbon lac mul cha'an yom i yΛc' ti tsictiyel i c'otyajlel i ñuclel cha'añonla p'untyΛbilon bΛ la i cha'an, como ti wΛ yajcΛyonla cha'an mi yΛq'ueñonla i ñuclel.

24 Joñonla pΛybilonla i cha'an Dios. An tsa' bΛ i pΛyΛ loq'uel ba'an israelob. An yambΛ pΛyΛbilo' bΛ loq'uel ba'an mach bΛ israelobic.

25 Che' bajche' mi yΛle' ti' t'an Dios ya' ti jun Oseas bΛ i c'aba'. Mi yΛl:

Jini mach bΛ c cha'añob ti yambΛ ora mi quej c pejcañob tic cha'añob.

Jini mach bΛ p'untyΛbilob ti yambΛ ora mi quej c pejcañob ti p'untyΛbilob bΛ c cha'an.

26 Ya' ti jini jach bΛ jun ti subentiyob: Mach c cha'añetla. Che' ti yΛlΛ Dios.

Ya' ti jini jach b_Λ lum mi quejel i pejc_Λntyelob ti yalobilob jini cuxul b_Λ Dios.

Che' ti y_{ΛΛ} Dios ti jun Oseas b_Λ i c'aba'.

²⁷ Isaías je'el ti' tyaja ti t'an jini israelo' b_Λ quixtyañujob. Ti y_{ΛΛ}: Aunque ñoj i yonlelob jini israelob che' bajche' an i ji'il colem ja', pero ma'ix ñoj cab_Λlob mi quejel i coty_Λntyelob.

²⁸ Como che' lac Yum mi quejel i y_Λc' melojel ti mulawil ts'_Λc_Λl yic'ot ti ora jach mi quejel i melob quixtyañujob. Che' ti y_{ΛΛ} Isaías.

²⁹ Yic'ot an yamb_Λ t'an tsa' b_Λ i ñaxan al_Λ Isaías che' ti' tyaja ti t'an israelob. Ti y_{ΛΛ}:

Lac Yum jiñ_Λch i yum mulawil yic'ot ti pejtyelel i b_Λl. Machic ti' c_Λybeyonla cha'tiquil ux-tiquil la calobilob cha'an mi cha' oc'an quixtyañujob

lajal ti jis_Λntiyonla bajche' jini año' b_Λ ti lum tyac Sodoma yic'ot Gomorra b_Λ i c'aba'.

Che' ti y_{ΛΛ} Isaías.

Israelob yic'ot i t'an Dios

³⁰ ¿Ch_Λ b_Λ yom mi la c_Λl, che' jini? Mi la c_Λl cha'an jini mach'_Λ israelo' b_Λ quixtyañujob mach'_Λ ba'an ti saj_Λyob i tyoj is_Λntyel ti Dios, jiñob_Λch ti q'uejli ti tyoj ti Dios cha'an ti' ch'ujbiyob cha'an ajcotyaya i cha'an Cristo.

³¹ Pero jini israelob tsa' b_Λ lolon jop'oyob i tyoj isañob i b_Λ yic'ot Dios cha'an i jac'bentyel i mandar Moisés cha'an i y_Λq'uentyelob i q'uejlel ti tyoj ti Dios, mach'an ti' q'ueleyob ti tyoj ti Dios como ma'an ti mejli i lu' jac'ben ti ts'_Λc_Λl pejtyelel jini mandar tyac.

³² ¿Chucoch mach'an ti q'uejliyob ti tyoj ti Dios? Como ti' jop'o i q'uejlel ti tyoj cha'an mi' cha'leñob ti pejtyelel bajche' ts'ijbubil ti jini mandar tyac, mach cha'anic ti' ch'ujbiyob Cristo ti' pusic'al. Ti' jats'ayob i yoc ti tyun yubil. Como Cristo che' bajche' tyun ya' ti bij ba' mi ñumel quixtyañu.

³³ Jiñach jini tyun mu' b_Λ i tyaje' ti t'an Ts'ijbubil b_Λ i T'an Dios ba' Dios ti y_ΛΛ:

Joñon ti c_Λc'Λ ya' ti Sión juntiquil che' bajche' tyun yubil ba' mi' jats'ob i yoc quixtyañujob, che' bajche' colem tyun yubil mu' b_Λ i y_Λc'ob ti yajlel.

Pero majchical jach mu' b_Λ i ch'ujbin jini juntiquil che' bajche' tyun b_Λ yubil, mach'an ba' b_Λ ora mi quejel i y_Λlob cha'an mach'an wen cha'an ti' ch'ujbiyob.

Che' mi y_Λle' ti Ts'ijbubil b_Λ i T'an Dios.

10

¹ Quermañujob, ti pejtyelel c pusic'al wersa com mi coty_Λntyelob c pi'lob israelo' b_Λ. Mij c'ajtiben Dios ti oración cha'an mi coty_Λntyelob.

² Cujil isujm mi' ch'ujutisañob Dios ti jump'ej i pusic'al pero mach'an mi' ch'Λm'eñob isujm bajche' Dios yom i cotyan quixtyañujob.

³ Mach'an mi' ña'tyañob bajche' Dios mi y_Λq'uen quixtyañujob tyoj b_Λ i pusic'al. Mi' bajñel jop' i tyoj isan i b_Λ cha'an q'uejlic ti tyoj ti Dios. Ma'an mi y_Λc'ob i b_Λ ti Dios cha'an mi q'uejlel ti tyoj.

⁴ Como ti Cristo ti ts'actiyi i c'Λjnibal i mandar Moisés. Jin cha'an mi' q'uel ti tyoj ti pejtyelelob mu' b_Λ i ch'ujbiñob Cristo ti' pusic'al.

5 Ti Ts'ijbubil b_Λ i T'an Dios, Moisés ti' tyaja ti t'an jini quixtyañujob mu' b_Λ i bajñel jop' i tyoj isan i b_Λ cha'an mi q'uejlel ti tyoj ti Dios cha'an i ch'ujbintyel mandar tyac. Ti y_ΛΛ: Jini mu' b_Λ i junyajlel jac'ben ti ts'Λcal jini mandar tyac c'ajacña i yoj mi yajñel w_Λ' ti mulawil yic'ot mi quejel i y_Λq'uentyel tsiji' b_Λ i cuxty_Λlel mach'Λ yujil jilel.

6 An t'an ti' t'an Dios je'el cha'an jini mu' b_Λ i q'uejlel ti tyoj ti Dios cha'an mi' ch'ujbiñob Cristo ti' pusic'al. Mi y_ΛΛ: Mach yom a w_Λle' ti a pusic'al, ¿majchqui mi quejel i letsel majlel ti panchan? che'etla, cha'an mi p_Λye' jubel Cristo i cotyañonla.

7 Yic'ot mach yom a w_Λle', ¿majchqui mi quejel i jubel majlel ba'an sajtyemo' b_Λ? che'etla, cha'an mi' p_Λy letsel Cristo.

8 ¿Ch_Λ b_Λ yom i y_Λle' ili t'an? Mi y_Λle': Ya'an lac'Λl ba'añet i t'an Dios. An ti la' ti' cha'an mi la' sub. An ti la' pusic'al cha'an mi la' ch'Λmben isujm. Che' mi y_Λle'. Jiñ_Λch jini t'an mu' b_Λ lac sub majlel cha'an an laj coty_Λntyel che' mi lac ch'ujbin Cristo ti lac pusic'al.

9 Mi ti a subu ti a ti' mi a yum_Λch Jesús, mi ti a ch'ujbi ti a pusic'al cha'an tsa'ix i tyeche loq'uel Dios ba'an sajtyemo' b_Λ, mi quejel a coty_Λntyel.

10 Como che' mi lac ch'ujbin Jesucristo ti lac pusic'al mi laj q'uejlel ti tyoj ti Dios. Che' mi lac sub ti' tyojlel quixtyañujob cha'an tsa'ix lac ch'ujbi che' jini mi laj coty_Λntyel.

11 Mi y_Λle' ti Ts'ijbubil b_Λ i T'an Dios: Mach'an majch mu' b_Λ i ch'ujbin Jesucristo mu' b_Λ quejel i y_Λle' cha'an ma'ix wen cha'an ti' ch'ujbi. Che' ts'ijbubil.

12 Como Dios junlajal mi' q'uel quixtyañu mi israelob mi mach b^Λ israelobic. Juntiquil jach lac Yum, jiñ^Λch i Yum ti pejtyelelob. Mi wen y^Λq'ueñob i yutslel i pusic'al ti pejtyelelob mu' b^Λ i c'ajtin i coty^Λntyel.

13 Como mi y^Λle' ti Ts'ijbubil b^Λ i T'an Dios: Majchical jach mi' pejcan lac Yum cha'an i c'ajtin i coty^Λntyel mi quejel i coty^Λntyel. Ch^Λ'^Λch ts'ijbubil.

14 ¿Pero bajche' ch'ujbi i pejcañob lac Yum cha'an i c'ajtin i coty^Λntyel mi mach'an ti' ch'ujbiyob cha'an ajcotyayaj^Λch i cha'an? ¿Bajche' ch'ujbi i ch'ujbiñob lac Yum mi mach'an ba' b^Λ ora ti yu-bibeyob i t'an? ¿Bajche' ch'ujbi i yubiñob i t'an Dios mi mach'an majch mi' subeñob?

15 ¿Bajche' ch'ujbi i sujbel majlel i t'an Dios mi mach'an majch mi' chocob majlel ti subt'an? Mi y^Λle' ti Ts'ijbubil b^Λ i T'an Dios: Ñoj cotyajax jini mu' i ty^Λlelob i sub jini t'an cha'an bajche' mi lac tyaj i ñ^Λch'ty^Λlel lac pusic'al. Jiñ^Λch jini wen t'an cha'an laj coty^Λntyel. Che' mi y^Λle' ti Ts'ijbubil b^Λ i T'an Dios.

16 Pero mach ti pejtyelel mi' ch'ujbiñob cha'an ñoj meel jini wen t'an cha'an laj coty^Λntyel. Che'^Λch bajche' ti y^Λ^Λ Isaías je'el. C Yum, mach'an cab^Λlob mi' ch'ujbiñob cha'an ñoj meel jini t'an mu' b^Λ lojon c subeñob. Che' ti y^Λ^Λ Isaías.

17 Pero jini tsa' b^Λ ch'ujbiyob ti' ch'ujbiyob cha'an ti yubiyob jini t'an. Jini t'an tsa' b^Λ yubiyob jiñ^Λch t'an cha'an Cristo.

18 Che' jini mij c'ajtibeñetla, ixcu jini mach'^Λ ba'an ti' ch'ujbiyob, ¿mach'a ba'an ti yubiyob jini

t'an? Tsa'ix i yubiyob. Como ti Ts'ijbubil b_Λ i T'an Dios mi y_Λle':

Tsa'ix pujqui majlel jini t'an ti pejtyelel mulawil.

Tsa'ix c'oti t'an c'Λ_Λ ti junwejl mulawil.

Che' ts'ijbubil.

¹⁹ Che' jini an ch_Λ b_Λ yamb_Λ mij c'ajtibeñetla. ¿Mach'a ba'an ti' ch'Λmbeyob isujm jini israelob cha'an jini t'an tsa' b_Λ subentiyob? Tsa'ix i ch'Λmbeyob isujm, yubil. Como che' ñac max tyo ti' cha'le t'an Isaías, ñaxan Dios ti' c_Λambe i ti' Moisés i y_Λle':

Mi quej j c'Λñe' mach'Λ israelobic b_Λ quixtyañujob cha'an i y_Λq'ueñetla la' mich'q'uelob cha'an ti caj mi' tyajob i wenlel.

Mi quej j c'Λñob jini mach'Λ ba'an i ña'ty_Λbal cha'an i tyejchbeñetla la' mich'lel cha'an ti caj ti aq'uentiyob i wenlel ti Dios.

Che' ti y_ΛΛ Moisés.

²⁰ Ti wi'il Isaías ti' cha'le ch'ejl b_Λ t'an tsa' b_Λ subenti ti Dios. Ti y_ΛΛ:

Jini mach'Λ ba'an ti' saj_cayon ti' tyajayoñob.

Tic tsictis_Λbe c b_Λ ti jini mach'Λ ba'an ti' c'ajtibeyon majchonqui.

Che' ti y_ΛΛ Dios ti ti' Isaías.

²¹ Che' ti' tyaja ti' t'an israelob, Dios ti' c'Λambe i ti' Isaías i y_Λle': Ti pejtyelel q'uin ch_Λncol c p_Λye' quixtyañujob mach b_Λ yomob i ch'ujbiñoñob cha'an mi y_Λq'ueñoñob i b_Λ. Mi' contrajiñoñob c t'an. Che' ti y_ΛΛ Dios, che'en Isaías.

11

Israelob tsa' b_Λ tyajayob i coty_Λntyel

¹ Wale mij c'ajtibeñetla, ¿tsa'ix ba junyajlel c'ajyiyob ti Dios jini israelob, jiñach i cha'añob. Mach'an. Mi sajlic. Como joñon israelon je'el. Jini c yum ti ñoj oniyix, jiñach Benjamín, i jiñajlel Abraham.

² C'ala ñoj oniyix Dios ti w_Λ yajc_Λ jini israelob cha'an i cha'año' b_Λ. Ma'an ti junyajlel c'ajyiyob. ¿C'ajal ba la' cha'an bajche' an ti Ts'ijbubil b_Λ i T'an Dios? Che' mu' ti oración, Elías ti' subu Dios i mul israelob. Ti y_{ΛΛ}:

³ C Yum, tsa'ix i tsansayob tsa' b_Λ a xiq'ue i y_Λle' a t'an. Tsa'ix i jemeyob jini yajnib tyac ba' ma' w_Λq'uentyel a majtyan. C bajñel ti c_Λyleyon. Yom i tsansañoñob je'el. Che' ti y_{ΛΛ} Elías.

⁴ Pero Dios ti' jac'Λ: Mach a bajñel ti c_Λleyet. Tsa'ix j c_Λñaty_Λyob siete mil winicob mach'Λ ba'an ti' ñoc chocoyob i b_Λ i ch'ujutisañob jini dios tye' Baal b_Λ i c'aba'. Che' ti y_{ΛΛ} Dios.

⁵ Che' bajche' wale iliyi je'el mach'an ti' lu' c'ajyiyob ti Dios ti pejtyelel israelob. Pero añob jini tsa' b_Λ yajc_Λntiyob ti Dios cha'an ti yutslel i pusic'al.

⁶ Dios mi yajcan quixtyañujob cha'an ti yuts'lel i pusic'al Dios, mach cha'anic wen b_Λ i cha'libal quixtyañujob. Mi tsa'ic i yajc_Λyob cha'an wen b_Λ i cha'libal, mach cha'anic i yutslel i pusic'al mi yajc_Λntyelob, che' jini.

⁷ ¿Ch_Λ b_Λ yes i sujmllel jini tsa' b_Λ ujtí, che' jini? Jini israelob ti' s_Λcleyob bajche' mi' bajñel tyoj isañob i pusic'al yic'ot Dios. An tsa' b_Λ q'uejliyob ti tyoj ti Dios, pero jini jach jini tsa' b_Λ yajc_Λntiyob ti Dios. Ti ts_Λts is_Λnti i pusic'al jini yaño' b_Λ.

⁸ Che' bajche' mi y_Λle' ti Ts'ijbubil b_Λ i T'an Dios: Dios ma'an ti y_Λq'ueyob i ch'Λmbeyob isujm. An i wut pero mach'an mi' ch'Λmbeñob isujm jini mu' b_Λ i q'uelob. An i chiquin pero mach'an mi' ña'tyañob i sujmllel jini mu' b_Λ yubiñob. Ch'Λ^Λch mi yujtyel c'ΛΛ wale. Che' mi y_Λle' ti Ts'ijbubil b_Λ i T'an Dios.

⁹ David ti y_ΛΛ je'el:

La' p_Λntiyic ti yac yubil jini wen tyac b_Λ mu' b_Λ i mulañob,
cha'an mi chujquelob, cha'an mi yajlelob, cha'an
mi y_Λq'uentyel i xot'ob i mul.

¹⁰ La' yajpic i wut cha'an ma'an mi c'otyel i wut.
La' i bej cha'len cotyocniyel majlel yubil cha'an ti
bele' ora.
Che' ti y_ΛΛ David.

I coty_Λntyel jini mach b_Λ israelobic

¹¹ Wale mij c'ajtibeñetla, ¿tsa' ba i junyajlel c_Λjyiyob ti Dios israelob cha'an ti' poj jats'ayob i yoc cha'an mach'an ti' ch'ujbiyob Cristo ti' pu-sic'al? Mach'an. Pero cha'an mach'an ti jac'beyob Dios jini israelob, tsa'ix coty_Λntiyob jini mach b_Λ israelobic. Jiñ^Λch ch_Λ b_Λ mi quejel i c'Λñe' Dios cha'an i y_Λq'uen israelob i mulan i coty_Λntyel che' ñac mi yilan coty_Λbilobix jini mach b_Λ israelobic.

¹² Cha'an mach'an ti' ch'ujbiyob Cristo israelob, ti aq'uentiyob i wenlel Dios yamb_Λ quixtyañujob año' b_Λ ti pejtyelel mulawil. Che' jini, mi ti caj ti chilbentiyob i cha'an b_Λ israelob ti aq'uenti jini mach b_Λ israelobic, ñoj más wen mi quejel i y_Λq'uentyelob ti pejtyelel año' b_Λ ti mulawil che' mi' ch'ujbiñob Cristo jini israelob je'el.

13 Wale an ch_Λ b_Λ mic subeñetla mach b_Λ is-raeletla. Dios ti' chocoyon majlel ti sub t'an ya' ba'añetla. Mic ña'tyan wen ñuc jini c troñel.

14 Jini com b_Λ, jiñ_Λch cha'an c pi'_Λlob jini israelob b_Λ mi yilan bajche' añetla che' an la' coty_Λntyel ti Dios. Cha'an che' mi' q'ueletla mi quejel i wersa mulan i yajñel bajche' añetla. Che' jini cha'tiquil, uxtiquil mi coty_Λntyelob je'el.

15 Cha'an ti caj ti' c_Λjyiyob israelob ti Dios, ti la-jmis_Λbentiyob i contrajiya ti' tyojlel ti pejtyelelob yaño' b_Λ quixtyañujob. ¿Mach ba ñoj c'otyajax mi quejel i yujtyel che' Dios mi' q'uel ti tyoj jini is-raelob? Che' bajche' mi ti tyejchiyob loq'uel ba'an sajtyemo' b_Λ.

16 Jini israelob che' bajche' junc'ojl sa'. Mi ti aq'uenti Dios jini ñaxan b_Λ junq'uej waj jiñ_Λch i señañlel cha'an lu' i cha'añ_Λch Dios ti pejtyel jini sa' yubil. Mi i cha'añ_Λch Dios i wi' tye', lu' i cha'añ_Λch Dios i c'_Λb tyac je'el. Mi lac ña'tyan, che' jini, i cha'añ_Λch Dios Abraham, jini cha'an i cha'añ_Λch Dios yaño' b_Λ israelob je'el como lu' i jiñ_Λjlel Abraham.

17 Jini israelob tsa' b_Λ i c_Λy_Λyob Dios ch_Λ'_Λch añob bajche' i c'_Λb tyac jini olivo tye' tsa' b_Λ tsejpi loq'uel ti i tye'el. Pero jatyetla mach b_Λ israeletla lajaletla bajche' i c'_Λb tyac olivo tye' tsa' b_Λ bajñel coli ti ma'tye'el. Ti ots_Λntiyetla ya' ba' ti tsejpi loq'uel jini ñaxan b_Λ i c'_Λb tyac. Che' jini, mi la' tyaj tsiji' b_Λ la' cuxty_Λlel ti' wi' yubil.

18 Pero jatyetla tsa' b_Λ ots_Λntiyetla ti tye' yubil, mach yom mi la' lolon sub la' b_Λ ti ñuc ti' contra i c'_Λb tye' tsa' b_Λ tsejpi loq'uel. Mi ti a subu a b_Λ ti ñuc, yom c'ajal la' cha'an cha'an mach'an ch_Λncol

la' w^Λq'uen i p'^Λty^Λlel i wi' jini tye' pero jini i wi' tye' mi y^Λq'ueñetla la' p'^Λty^Λlel.

¹⁹ C'o'ojl mux la' w^Λle': Melel, pero ti tsejpi loq'uel lamital i c'^Λb tyac cha'an ti ots^Λntiyonla che'etla.

²⁰ Melel^Λch. Pero ti tsejpi loq'uel yubil cha'an mach'an ti ch'ujbiyob Dios ti' pusic'al. Jatyetla ti ots^Λntiyetla cha'an jach ti la' ch'ujbi Dios. Ma' mi la' chan isan la' b^Λ che' jini. Wen q'uele la' b^Λ.

²¹ Como mi Dios mach'an ti' ñ^{us}Λbeyob i mul jini israelob jini yoque i c'^Λb olivo yubil cha'an mach'an ti' ch'ujbiyob Cristo, mach'an mi quej i ñ^{us}Λbeñetla la' mul je'el.

²² Ña'tyanla bajche' an i yutslel Dios. Pero an i p'^Λty^Λlel je'el che' mi y^Λq'ue' xot'mulil. Ti p'^Λty^Λlel i t'an ti y^Λq'ue xot'mulil israelob tsa' b^Λ i ñ^{us}Λbeyob i t'an. Pero tsa'ix i p^Λs'eyetla i yutslel Dios. Pero mi ma'ix mi la' bej ajñel ti i yutslel mi quej la' tsejpel loq'uel je'el.

²³ Pero jini israelob tsa' b^Λ tsejpiyob loq'uel cha'an mach'an ti ch'ujbi Dios ti' pusic'al, mi ti cha' ch'ujbi mi quej i cha' ots^Λntyelob yubil. Como an i p'^Λty^Λlel Dios cha'an i yotsan.

²⁴ Como jatyetla mach b^Λ israeletla, tsa'ix tsejpiyetla loq'uel ti juntyejc olivo tye' tsa' b^Λ bajñel coli ti ma'tye'el. Ti ots^Λntiyetla ti jini wen b^Λ olivo tye' yubuil. Mi ch'ujbi la' wots^Λntyel che' mach yoque i c'^Λbeticla, jinic tyo israelob más ch'ujbi i cha' ots^Λntyelob como jiñ^Λch yoque i c'^Λb jini olivo tye' yubil.

Mi quej i coty^Λntyelob israelob

25 Hermañujob, com mi la' ña'tyan jini cantisa cha'an israelob max tyo b_Λ ba'an tsictiyem ti yamb_Λ ora. Ame mi la' lolon chan isan la' b_Λ ti la' pusic'al. Lamitalob israelob ti' ts_Λts is_Λbentiyob i pusic'al pero mach ti junyajlel jach. Jini jach ts_Λts mi c_Λty_Λl jintyo mi c'otyel i yorojlel che' ts'_Λc_Λl ti' ch'ujbi Dios jini mach b_Λ israelob jiñ_Λch jaytiquil w_Λ yajc_Λbilo' b_Λ mi quejel i ch'ujbiñob.

26 Che' mi coty_Λntyelob jaytiquilob jini mach b_Λ israelob mu' b_Λ quej i coty_Λntyelob, che' jini ti jim b_Λ ora ti pejtyelel israelob mi quejel i coty_Λntyelob. Como ti Ts'ijbubil b_Λ i T'an Dios mi y_Λl:

Jini Ajcotyayaj mi quejel i loq'uel ty_Λlel ti Sión,
Mi quejel i loc's_Λbeyob ti pejtyelel i simaronlel ti'
pusic'al israelob, i jiñ_Λjlelob Jacob.

27 Ch_Λ'_Λch mi quej c ts'_Λctisan jini trato b_Λ c t'an quic'otyob

che' mic ñus_Λbeyob i mul.

Che' mi y_Λl Dios ti Ts'ijbubil b_Λ i T'an.

28 Jini israelob mi contrajintyelob ti Dios cha'an ti' ñus_Λbeyob i t'an cha'an laj coty_Λntyel. Pero cha'an ti' contrajiyob Dios israelob, ti queji ti sujbel jini wen b_Λ t'an ya' ba'añetla mach b_Λ israelet b_Λ la. Pero aunque ch_Λ'_Λch ti' cha'le Dios, mu' tyo i bej p'untyañob israelob como yajc_Λbil i cha'an Dios jini i yumob ti ñoj oniyix.

29 Dios mach'an mi' q'uextyan i pensal cha'an ch_Λ b_Λ tyac mi y_Λq'uen. Mach'an mi' q'uextyan i pensal cha'an mu' b_Λ i p_Λye' cha'an mi yochel ti i cha'an.

³⁰ Ti oniyix jatyetla mach b_Λ israelet la ti la' ñus_Λbe i t'an Dios. Pero wale Dios mi' p'untyañetla como jini israelob ti' ñus_Λbeyob i t'an.

³¹ Lajal bajche' jatyetla ti la' ñus_Λbe i t'an Dios ti ñoj oniyix, ch_Λ'_Λch ch_Λncox i ñus_Λben i t'an Dios israelob je'el. Pero Dios mi quejel i p_Λs'eñob israelob i p'unty_Λntyel ch_Λ'_Λch bajche' mi' p'untyañetla mach b_Λ israelet la.

³² Como Dios mi y_Λle' ti xmulilob ti pejtyelel quixtyañu cha'an ti' ñus_Λbeyob i t'an. Pero cha'an lu' xmulilob, Dios ch'ujbi i lu' p_Λs'eñob i p'untyaya.

³³ Ma'an i p'isol jini wen tyac b_Λ i cha'an Dios yic'ot i ña'ty_Λbal. Mach ch'ujbi laj c_Λmben i ña'ty_Λbal. Mach ch'ujbi lac saj ch'amben isujm jini mu' b_Λ i cha'len.

³⁴ Como ¿am ba majch mi' ch'amben isujm ch_Λ b_Λ mi' ña'tyan lac Yum? ¿Am ba majch ti' c_Λntis_Λ lac Yum? Mach'an majch.

³⁵ ¿Am ba majch ti ñaxan aq'ue i majtyan Dios cha'an mi' cha' ch'amben i q'uexol? Ma'an majch.

³⁶ Como ch'oyol ti Dios ti pejtyelel ch_Λ b_Λ an. Lu' i melbal_Λch. Ti' lu' mejli cha'an mi tsictiyel i ñucl_Λl. La' subjic i ñucl_Λl Dios ti pejtyelel ora. Amén.

12

Jini tsijib b_Λ laj cuxty_Λlel ti Cristo

¹ Jin cha'an quermañujob, cha'an ñoj cab_Λl ti' p'unty_Λyonla Dios yom mi laj c_Λc' lac b_Λ ti Dios che' bajche' cuxul b_Λ i majtyan yubil mu' b_Λ i mulan Dios. Como ch_Λ'_Λch yom mi lac ch'ujutisan Dios ti pejtyelel lac pusic'al.

² Mach yom mi la' cha'len mach'_Λ wen bajche' i ty_Λlel mi' cha'leñob jini año' b_Λ ti mulawil. Pero jini

yom b_Λ jiñ_Λch cha'an q'uextiyic la' pensal cha'an mi' tsijibtis_Λntyel la' pusic'al. Che' jini ch'ujbi la' c_Λn ch_Λ b_Λ yom Dios. Mi la' c_Λn ch_Λ b_Λ wen tyac, ch_Λ b_Λ mi' mulan Dios yic'ot ts'ac_Λl mi la' mele' bajche' yom Dios.

³ Dios ti y_Λq'ueyon j c'_Λjnibal ti subt'an cha'an ti yutslel i pusic'al. Jin cha'an mic subeñetla ti jujuntiquiletla mach yom mi la' ña'tyan ti la' pusic'al más an la' ñucl_Λ bajche' an la' ñucl_Λ. Pero ti tyoj b_Λ la' pensal ti jujuntiquil yom i pensalin ch_Λ b_Λ yes yoque i c'_Λjnibal tsa' b_Λ aq'uenti ti Dios cha'an ti' ch'ujbi cha'an mi' cha'len ch_Λ b_Λ yom Dios.

⁴ Ti' b_Λc'tyal jujuntiquil an cab_Λl ch_Λ b_Λ tyac chucul. Pero mach junchajpic jach i c'_Λjnibal jini chuchil tyac b_Λ.

⁵ Che' je'el ochemon b_Λ la ti' t'an Dios, aunque cab_Λlonla, jump'ej jach lac b_Λc'tyal yubil che' mi la cajñel yic'ot Cristo. Lac tyem cha'añ_Λch lac b_Λ ti jump'ej jach b_Λc'tyal_Λ yubil.

⁶ Dios, ti yutslel i pusic'al, ti y_Λq'ueyonla laj c'_Λjnibal ti jujuntiquilonla jiñ_Λch bajche' yom Dios. Mach junlajal ti y_Λc'onla laj c'_Λjnibal. Yom mi laj c'_Λn laj c'_Λjnibal. Mi an laj c'_Λjnibal ti subt'an, yom mi lac sub ti p'isol bajche' Dios mi y_Λq'ueñonla lac ch'ujbin.

⁷ Mi ti y_Λq'ueyonla laj c'_Λjnibal cha'an laj cotyan yaño' b_Λ, yom mi lac cha'len cotyaj ti jump'ej lac pusic'al. Mi an laj c'_Λjnibal lac cha'len c_Λntisa yom mi lac cha'len ti wen.

⁸ Jini yujil i ñuc is_Λben i pusic'al i pi'_Λl, la' i bej cha'len. Jini mu' b_Λ i y_Λq'uen i pi'_Λlob ch_Λ b_Λ an i cha'an, yom i y_Λq'uen ti pejtyel i pusic'al. Jini am b_Λ i ye'tyel cha'an i tyoj'isan ochemo' b_Λ ti' t'an

Dios, yom i wen cha'len ti xuc'ty^Λlel i pusic'al. Jini mu' b^Λ i p'untyan año' b^Λ i wocol cha'an i cotyan, yom i cha'len ti' tijicniyel i pusic'al.

Jini yom b^Λ i cha'len ochemo' b^Λ ti' t'an Dios

⁹ Yom mi la' p'untyan la' b^Λ ti pejtyel la' pusic'al. Choco loq'uel ti la' pusic'al ti pejtyel i simaronlel. Bej cha'lenla ch^Λ b^Λ tyac wen.

¹⁰ P'untyan la' b^Λ ti pejtyel la' pusic'al che' bajche' la' wijts'in la' b^Λ. Yom mi la' más q'uel ti ñuc la' pi'Λlob bajche' mi la' bajñel q'uel la' b^Λ.

¹¹ Bej cha'lenla wersa. Mach yom ts'ubetla. Cha'libenla i toñel lac Yum ti pejtyel la' pusic'al.

¹² Yom tijicñayetla cha'an jini ch^Λncol b^Λ la' bej pijtyan ti lac Yum. Yom mi la' cuche' ti wen la' wocol. Mach yom la' saj c^Λy la' cha'len oración.

¹³ Che' an i wocol ochemo' b^Λ ti' t'an Dios cotyañob ti ch^Λ b^Λ tyac yom i cha'an. P^Λy^Λla ochel ti la' wotyot mu' b^Λ i jula'añetla.

¹⁴ Aq'uenla i yutslel la' t'an jini mu' b^Λ i ty^Λc'lañetla. Mach yom mi la' ch'Λque'. Yom mi la' c'ajtiben Dios i yutslel i t'an ti' tyojlelob.

¹⁵ Yom c'ajacña la' woj yic'ot c'ajacñayob b^Λ i yoj. Cha'lenla uq'uel yic'ot jini muc'ob b^Λ ti uq'uel.

¹⁶ Ajñenla ti jump'ej la' pusic'al yic'ot la' pi'Λlob. Mach yom mi la' q'uel la' b^Λ ti ñuc pero lajal ajñenla awic'ot jini mu' b^Λ i q'uelob i b^Λ ti pec'. Mach yom mi la' lolon ña'tyan jatyetla an cab^Λ la' bajñel ña'ty^Λbal.

¹⁷ Mach yom mi la' q'uextyan i simaronlel yamb^Λ quixtyañu. Jop'oxla la' cha'len wen b^Λ ti' tyojlelob ti pejtyelel quixtyañujob.

¹⁸ Cha'lenla ti pejtyelel bajche' ch'ujbi la' cha'len, cha'an mi mux i mejlel mi la' wajñel ti ñach'al yic'ot ti pejtyel quixtyañujob.

¹⁹ P'untya^Λbilet b^Λ la quermañujob, mach yom mi la' bajñel q'uex^{tyΛ}ben i simaronlel yaño' b^Λ. La' ajnic. Dios mi quejel i q'uex^{tyΛ}ben. Como mi ya^{le}' ti Ts'ijbubil b^Λ i T'an Dios: An tic wenta mij q'uex^{tyΛ}ben i simaronlel. Joñon mi ca^q'uen i xot'e' ch^Λ b^Λ ti' cha'le ti a contra, che' mi ya^l lac Yum ti Ts'ijbubil b^Λ i T'an.

²⁰ Mi ya^{le}' je'el: Che' mi yubin wi'ñal a contra, we'isan. Mi ty^Λquin i ti', aq'uen ch^Λ b^Λ mi' jap. Mi ch^Λ'ach mi la' cha'len mi quej i quisnin i b^Λ cha'an jini tsa' b^Λ i cha'le ti a contra. Che' mi ya^{le}' ti' t'an Dios.

²¹ Che' an la' contrajintyel, ma' mi la' q'uex^{tyΛ}ben i simaronlel, pero yom mi la' cha'len uts b^Λ ti i tyojlel.

13

¹ Ti jujuntiquil wersa yom mi' ch'ujbiben i t'an jini año' b^Λ ye'tyel ti mulawil. Como Dios ti ya^{c'Λ} i t'an cha'an i wa'chocontyel e'tyel^{Λl} tyac. Dios ti' wa'chocoyob jini año' b^Λ ye'tyel.

² Jin cha'an, jini mu' b^Λ i ñus^Λbeñob i t'an jini año' b^Λ ye'tyel ch^Λncol i ñus^Λben jini wa'chocobil b^Λ i cha'an Dios. Jini mu' b^Λ i ñusañob t'an añach i mul. Mi quej i xot' i mul ti tyojlel am b^Λ ye'tyel.

³ Como mach wa'chocobil am b^Λ ye'tyel cha'an i ba^c'tisan quixtyañu mu' b^Λ i cha'len ch^Λ b^Λ wen pero jini jach mu' b^Λ i cha'len simaronlel. Mi mach a wom a ba^c'ñan jini am b^Λ ye'tyel, bej cha'lenla wen b^Λ. Che' jini mi' q'uelet ti wen.

⁴ Como jini am b_Λ ye'tyel i winic_Λch Dios cha'an ma' c_Λñ_Λty_Λntyel. Mi ch_Λncol a cha'len simaronlel, yom mi la' b_Λc'ñan che' jini, como mach lolomic jach an i ye'tyel cha'an i y_Λq'ueñet a xote' jini tsa' b_Λ a cha'le. Dios mi' c'ñe' jini am b_Λ ye'tyel cha'an i y_Λq'uen i xote' i mul jini mu' b_Λ i cha'len simaronlel.

⁵ Jin cha'an yom mi la' ch'ujbiben i t'an jini año' b_Λ ye'tyel, mach cha'an jach mi la' b_Λc'ñan i y_Λq'ueñet a xot' a mul, pero cha'an mach'an mi quej ti t'an la' pusic'al.

⁶ Jin cha'an yom mi la' w_Λc' tyojoñel je'el cha'an i coty_Λntyelob jini año' b_Λ ye'tyel. Como i winicob_Λch Dios ch_Λncol b_Λ i cha'libeñob i ye'tyel cha'an lac wenlel.

⁷ Aq'ueñob ti pejtyelelob jini yom b_Λ i y_Λq'uentyelob. Jini mu' b_Λ i ch'ame' tyojoñel, aq'uenla. Jini mu' b_Λ i ch'ame' tyojoñel cha'an ch_Λ b_Λ an la' cha'an, aq'uenla je'el. Jini yom b_Λ q'uejlic ti ñuc q'uelela ti ñuc. Jini yom b_Λ subjic ti ñuc, subula i ñuclel.

⁸ Tyojo la' bet ti pejtyelel bajche' ti a w_Λc'Λ a t'an. Como ch_Λ'ach an ti a wenta. Como cha'an p'untyaya, an ti la' wenta la' bej p'untyan la' b_Λ, como jini mu' b_Λ i p'untyan i pi'lob ts'ac_Λl mi' ch'ujbiben bajche' mi xijq'uelob ti mandar.

⁹ Mi y_Λle' ti mandar tyac: Mach a pejcan yamb_Λ winic yamb_Λ x'ixic. Mach a cha'len ts_Λnsa. Mach a cha'len xujch'. Mach a cha'len lot ti' contra a pi'lob. Mach a mich'q'uel ch_Λ b_Λ an i cha'an a pi'lob. Che' mi y_Λl ti mandar. Pero ts'ac_Λl mi lac jac' ili mandar yic'ot ti pejtyelel yamb_Λ mandar tyac che' mi lac ch'ujbiben jini jump'ej mandar ba'

mi' y^Λle': P'untyan a pi'^Λlob che' bajche' ma' bajñel p'untyan a b^Λ. Che' an ti mandar.

¹⁰ Jini mu' b^Λ i p'untyan i pi'^Λlob mach'an ch^Λ b^Λ mi' cha'len ti' contra. Jin cha'an, che' mi lac cha'len p'untyaya, ts'^Λc^Λl ch^Λncol lac jac' jini mandar.

¹¹ Yom mi la' cha'len pejtyel bajche' tic subetla, pero com je'el mi lac ña'tyan jiñ^Λch i yorojlel yom mi lac p'ixtisan lac b^Λ ti w^Λyel yubil. Como wale más l^Λc'^Λlix i yorojlel mi quej i ty^Λlel Cristo che' bajche' che' ñac ti lac ñaxan ch'ujbi melel^Λch i t'an.

¹² Yomox ñumel ac'b^Λlel. Yomox s^Λc'an yubil como l^Λc'^Λlix i cha' ty^Λlel lac Yum. Jin cha'an yom mi laj c^Λy lac cha'len mu' b^Λ i cha'leñob ti ic't'ojñal yubil. La' la cajñel ti wen che' bajche' quixtyañu mu' b^Λ i cha'len x^Λmbal ti q'uinil yubil.

¹³ La' lac cha'len bajche' yom che' añonla ti q'uinil. Mach yom mi lac cha'len q'uixnijel, mi lecojic b^Λ q'uinijel tyac, mi t'anic yic'ot yamb^Λ winic yamb^Λ 'ixic, mi yanic b^Λ bibajax b^Λ mu' b^Λ i cha'leñob, mi periyalic, mi i mich'q'uelolic ch^Λ b^Λ i cha'an lac pi'^Λlob.

¹⁴ Pero jini yom b^Λ, jiñ^Λch cha'an mi la c^Λc' lac b^Λ ti Cristo cha'an mi la cajñel che' bajche' yom lac yum Jesucristo. Yom mi laj c^Λy lac pensalin lac cha'len ch^Λ b^Λ mi' xic'onla lac cha'len jini lac bajñel pusic'al.

14

Mach yom a lolon al mi mach wen mi' cha'len yamb^Λ che' mach'an ma' ña'tyan

¹ Mi an juntiquil ochem b^Λ ti' t'an Dios pero mi max tyo mi' wen ch'^Λmben i sujmllel jini t'an,

pʌyʌla ochel ya' ba' mi la' much'quin la' bʌ, pero mach cha'aníc jach la' wom la' cʌʌx pejcan cha'an mu' bʌ i pensalin ti cha'chajplel i pusíc'al.

² La' lac poj ale': An ochemo' bʌ mu' bʌ i ña'tyan cha'an ch'ujbiyʌch i lu' c'uxe' chʌ bʌ c'uxbil. Pero jini max tyo ti' wen ch'ʌmbeyob isujm, ma'ix mi lu' c'uxe'. Jini jach mi' c'uxob pʌc'bil tyac bʌ.

³ Jini mu' bʌ i c'uxe' ti pejtyelel chʌ bʌ c'uxbil, mach yom i yʌle' cha'an mach wen mi' cha'len jini mach bʌ yom i lu' c'uxe'. Jini mach bʌ yom i lu' c'uxe' chʌ bʌ tyac, mach yom i lolon yʌle' ti' pusíc'al cha'an an i mul jini mu' bʌ i lu' c'uxe' como i cha'añʌch Dios jini quixtyañu je'el.

⁴ ¿A wenta ba cha'an ma' wʌle' mach wen mi' cha'len i winic juntiquil yumʌl? I wentajʌch i yum jini winic cha'an mi' q'uel mi wen o mi mach wen mi' cha'len. Pero weñʌch mi quejel i yujtyel yic'ot jini ochemo' bʌ ti' t'an Dios como an i pʌtyʌlel Dios yic'ot cha'an i cotyan cha'an weñʌch mi yujtyel.

⁵ La' lac poj cha' ale: An je'el jini mu' bʌ i q'uel ti más ñuc jump'ej q'uin bajche' yambʌ q'uin. An yaño' bʌ junlajal mi' q'uelob ti pejtyelel q'uin tyac. Pero ti jujuntiquil yom i wen ña'tyan ti jump'ej i pusíc'al bajche' yom.

⁶ Jini mu' bʌ i mel q'uin cha'an i ch'ujutisan lac Yum, mi' mele' cha'an i nuc isan lac Yum. Jini mach bʌ ba'an mi mel q'uin mi' ñusan i mele' cha'an i ñuc isʌntyel lac Yum je'el. Jini mu' bʌ i lu' c'uxe' chʌ bʌ c'uxbil chʌ'ʌch mi' cha'len cha'an mi' ñuc isan lac Yum como mi' suben Dios wocox i yʌʌ. Jini mach bʌ ba'an mi' c'uxe' ti pejtyelel chʌ bʌ tyac, chʌ'ʌch mi' cha'len je'el cha'an i ñuc isʌntyel lac Yum. Mi' suben Dios wocox i yʌʌ je'el.

⁷ Joñonla, che' ochemonla ti' t'an Dios, añonla ti' c'ab lac Yum. Ma'an mi lac cha'len bajche' mi lac bajñel mulan ti lac pusic'al. Mi la cajñel bajche' yom lac Yum. I wentajonla Dios mi cuxulonla o mi ti sajtiyonla.

⁸ Che' cuxulon tyo la, cuxulonla cha'an mi lac cha'len bajche' yom lac Yum. Che' mi lac sajtyel mi lac sajtyel cha'an che' yom lac Yum. Jin cha'an, mi cuxulonla o mi sajtyemonla, i cha'añonla lac Yum.

⁹ Como ti sajti Cristo. Ti cha' tyejchi loq'uel ba'an sajtyemo' b_Λ. Cha' cuxulix cha'an mi yochel ti' Yum sajtyemo' b_Λ yic'ot cuxulo' b_Λ.

¹⁰ Jatyet, ¿chucoch ma' lolon al ti a pusic'al an i mul a wermañu che' mach'an ma' ña'tyan? ¿Chucoch ma' ts'a'q'uel a wermañu? Como ti lac pejtyelel mi quejel lac wa'ty_Λl ya' ba' mi' melonla Cristo.

¹¹ Mi y_Λle' ti Ts'ijbubil b_Λ i T'an Dios:
Lajal me_Λlel ili t'an che' bajche' me_Λlel_Λch
cuxulon, che' mi y_Λl lac Yum. Ti pejtyelel
quixtyañujob mi quejel i wersa ñoc
chocoñob i b_Λ tic tyojlel.

Ti pejtyelelob mi quejel i subob i b_Λ cha'an joñon
Dioson.
Che' ts'ijbubil.

¹² Che' jini ti jujuntiquilonla mi quejel lac sub lac
b_Λ ya' ti tyojlel Dios.

Mach a wac' ti yajlel ti mulil a wermañu

¹³ Che' jini mach yom mi lac bej al ti lac pusic'al
mi an i mul lac pi'_Λlob che' mach'an mi lac ña'tyan.
An ti lac wenta lac wersa ña'tyan cha'an mach'an

mi lac saj cha'len ch_Λ b_Λ tyac mu' b_Λ i y_Λsan ti mulil la quermañu, mi ch_Λ b_Λ yes mi y_Λc' i yajlel ti mulil.

14 Cha'an ti lac ch'ujbi ajcotyaya lac cha'an lac Yum Jesús, mi lac wen ña'tyan ti jump'ej lac pusic'al cha'an mach'an ch_Λ b_Λ tic'bil cha'an laj c'uxe'. Lu' c'uxbil_Λch. Pero mi an majch mu' b_Λ i bajñel pensalin cha'an mach wen i c'uxe' ch_Λ b_Λ jach, che' jini mach wen i c'uxe' como ch_Λ'_Λch mi' bajñel pensalin ti' pusic'al.

15 Aunque mach'an ch_Λ b_Λ mi y_Λl a pusic'al che' ma' c'uxe' ch_Λ b_Λ jach, pero mi cha'an ti a c'uxu ti a tyejchbe i ch'_Λiyemlel i pusic'al a wermañu cha'an ti caj mach yom c'uxol mi' lolon ña'tyan, che' jini mi ti a bej c'uxu mach'an ma' p'untyan a wermañu, yubil. Mach yom a w_Λc' ti yajlel a wermañu cha'an jach a wom a c'uxe' ch_Λ b_Λ jach, como Cristo ti sajti cha'an a wermañu je'el.

16 Aunque ma' ña'tyan wen jini ch_Λncol b_Λ a cha'len, pero mach yom a w_Λc' ti tyechol mach'_Λ wen b_Λ t'an ti caj.

17 Che' mi lac yumin Dios mach jinic mi y_Λq'ueñonla lac pensalin ch_Λ b_Λ yom mi laj c'ux ch_Λ b_Λ yom mi lac jap. Pero mi y_Λq'ueñonla lac pensalin cha'an yom mi la cajñel ti tyoj cha'an mi la cajñel ti ñ_Λch'ty_Λlel lac pusic'al yic'ot ti c'ajacña b_Λ la coj ch'oyol b_Λ ti Ch'ujul b_Λ i Ch'ujlel Dios.

18 Jini mu' b_Λ i ña'tyan aunque mach'an ch_Λ b_Λ mi' cha'len mi ti' c'uxu ch_Λ b_Λ jach, pero mach'an mi' c'uxe' cha'an mi' p'untyan i yermañu, mi' cha'liben i toñel Cristo. Mi q'uejlel ti wen ti Dios yic'ot ti quixtyañujob.

19 Che' jini, la' lac wersa ña'tyan ch_Λ b_Λ tyac yom cha'an mi la cajñel ti ñ_Λch'Λl yic'ot cha'an bajche' yom mi lac motin xuc'chocon lac b_Λ ti lac Yum.

20 Mach a m_Λcty_Λben i nijc_Λbentyel i pusic'al quixtyañu ti Dios cha'an ti caj ch_Λ b_Λ jach ma' c'ux. Melel, weñ_Λch ti pejtyelel ch_Λ b_Λ tyac an. Pero mi an juntiquil la quermañu mu' b_Λ i pensalin cha'an mulil_Λch i c'uxe' ch_Λ b_Λ mi laj c'ux, pero mi ti wersa c'uxu che' mi yilan ch_Λncol laj c'uxe', tsa'ix la c_Λc'Λ ti yajlel ti mulil yubil como ti' c'uxu jini mu' b_Λ i bajñel pensalin tiq'uil i c'uxe'.

21 Weñ_Λch mach'an mi la' bej c'uxe' we'el mi mach'an mi la' jape' vino mi mach'an mi la' cha'len ch_Λ b_Λ tyac mu' b_Λ i y_Λq'uen i yajlel ti mulil la quermañu, o mu' b_Λ i y_Λq'uen cha'chajplel i pensal cha'an bajche' mi' ch'ujbin lac Yum.

22 Jini mu' b_Λ a ch'ujbin, ch'ujbin ti pejtyelel a pusic'al ti' tyojlel Dios. Tijicña jini winic mach'Λ ba'an ch_Λ b_Λ mi y_Λle' i pusic'al cha'an jini mu' b_Λ i cha'len.

23 An i mul jini mu' b_Λ i c'uxe' ch_Λ b_Λ tyac che' cha'chajp i pensal cha'an mi' pensalin mi wen o mi mach wen i c'uxe'. Como mach'an ti' c'uxu ti jump'ej i pusic'al. Che' mi lac pensalin ti lac pusic'al cha'an mach che'ic yom mi lac cha'len pero mi ti lac cha'le, mulil_Λch che' jini como mach'an ti lac cha'le ti jump'ej lac pusic'al.

15

Yom lac cha'len mu' b_Λ i q'uel ti wen la quermañu

¹ Joñonla, xuc'ulon b_Λ la ti jini mu' b_Λ lac ch'ujbin, yom mi laj cuchben i c'unlel jini c'un b_Λ la quermañu. Mach yom mi lac cha'len ch_Λ b_Λ bajñel yom lac pusic'al.

² Ti jujuntiquilonla, yom mi lac cha'len jini mu' b_Λ i q'uel ti wen la quermañujob cha'an i wenlel yic'ot cha'an i xuc'choncontyel i pusic'al ti lac Yum.

³ Como Cristo mach'an ti' cha'le ch_Λ b_Λ bajñel yom i pusic'al pero ti ujti yic'ot bajche' mi y_Λle' ti Ts'ijbubil b_Λ i T'an Dios. Cristo ti' sube Dios: Che' ñac ti y_Λl'eyetyob, ti y_Λl'eyoñob, che'en. Che' ts'ijbubil.

⁴ Como ti pejtyelel tsa' b_Λ ts'ijbunti ti' t'an Dios ti ñoj oniyix, ti ts'ijbunti cha'an laj c_Λantis_Λntyel. Mi y_Λq'ueñonla i xuc'ty_Λlel lac pusic'al yic'ot i ñuc is_Λntyel cha'an mach'an mi lac lujb'an laj cuche' ti wen lac wocol.

⁵ Jini Dios mu' b_Λ i y_Λq'ueñonla i xuc'ty_Λlel yic'ot i ñuc is_Λntyel lac pusic'al, la' i y_Λq'ueñetla la' motin ajñel ti jump'ej la' pusic'al che' bajche' yom Cristo Jesús.

⁶ Che' jini, ti jump'ej la' pusic'al ch'ujbi la' motin sub i ñuclel Dios, i Tyat lac Yum Jesucristo.

I subol i t'an Dios ba'an mach b_Λ israelob

⁷ Jin cha'an, cha'an i ñuc is_Λntyel Dios, q'uele la' b_Λ ti wen che' bajche' ti' q'ueleyetla ti wen.

⁸ Mic subeñetla cha'an ti ty_Λli Cristo cha'an i cotyan israelob cha'an mi' ts'_Λctisan jini t'an tsa' b_Λ w_Λ subentiyob lac yumob ti ñoj oniyix. Che' bajche' jini mi y_Λc' ti tsictiyel cha'an melel_Λch mi' ts'_Λctisan Dios jini tsa' b_Λ i w_Λ al_Λ mi quej i cha'len.

⁹ Ti ty^Λli je'el cha'an mi y^Λq'ueñob jini mach b^Λ israelobic cha'an i subeñob i ñuclel Dios cha'an ti' p'unty^Λntiyob je'el. Che' bajche' mi y^Λle' ti Ts'ijbubil b^Λ i T'an Dios. Cristo ti' pejc^Λ Dios. Ti y^ΛΛ:

Jini cha'an mi quej c sub a wenlel ya' ba'añob mach b^Λ israelobic.

Ti c'ay mi quej c tsictisan a ñuclel.

Che' ts'ijbubil.

¹⁰ Ya' ti yamb^Λ t'an ti Ts'ijbubil b^Λ i T'an Dios mi y^Λle':

Jatyetla mach b^Λ israelet la, motin tijicnisan la' pusic'al la' wic'ot jini yajc^Λbilo' b^Λ i cha'an Dios.

Che' ts'ijbubil.

¹¹ Ya' ti yamb^Λ t'an mi y^Λle':

Subula i ñuclel Dios ti pejtyeletla mach b^Λ israeletic la.

Subula i ñuclel Dios ti pejtyelex quixtyañujob ti pejtyelex pañimil tyac.

Che' ^Λch ts'ijbubil.

¹² Ti y^ΛΛ Isaías je'el:

Mi quej i ty^Λlel juntiquil i jiñ^Λjlel Isaí.

Mi quej i cha'len yum^Λl ti pejtyelex ba'an mach b^Λ israelobic.

Mi quej i ch'ujbiñob cha'an jiñ^Λch mu' b^Λ i yochel ti ajcotyaya i cha'añob je'el.

Che' ti y^ΛΛ.

¹³ Dios mu' b^Λ y^Λq'ueñetla la' pijtyan la' q'uel i ñuclel, la' i wen y^Λq'ueñetla i tijicniyel la' pusic'al yic'ot i ñ^Λch'ty^Λlel cha'an ch^Λncol la' ch'ujbin Dios. La' i jambeñetla la' pusic'al Ch'ujul b^Λ i Ch'ujlel Dios cha'an mi quej la' wen ña'tyan cha'an

melel^Λch mi quej i tsictiyel bajche' ch^Λncol la' pijtyan.

¹⁴ Quermañ^ujob, cujil isujm an cab^Λl i yutslel la' pusic'al yic'ot yaño' b^Λ. Cujil isujm je'el cha'an tsa'ix la' wen c^Λñ^Λ i t'an Dios yic'ot la' wujil la' c^Λntisan la' b^Λ.

¹⁵ Wersa tic xiq'ui c b^Λ cha'an mic ts'ijbubeñetla ili t'an. Pero che' jach mic cha'len cha'an mic cha' c'ajtis^Λbeñetla jini c^Λñ^Λlix b^Λ la' cha'an. Dios, ti' yutslel i pusic'al ti y^Λq'ueyon que'tyel cha'an ch^Λ'^Λch mic cha'len.

¹⁶ Ti y^Λq'ueyon i yutslel i pusic'al cha'an mic sub Jesucristo ya' ba'an jini mach b^Λ israelobic. Che' mic sub jini wen b^Λ t'an mic cha'len c toñel cha'an i coty^Λntyelob cha'an mi c^Λq'uen Dios jini mach b^Λ israelo' b^Λ cha'an i majtyan yubil. Jiñ^Λch i majtyan yom b^Λ i ch'^Λm Dios ch'ujutis^Λbil i cha'an Ch'ujul b^Λ i Ch'ujlel Dios.

¹⁷ Tijicñayon cha'an wen tic cha'libe i toñel Dios. Wen tic cha'le mach cha'anic c bajñel c toñel, pero cha'an Cristo ti' coty^Λyon.

¹⁸ Mach'an ch^Λ b^Λ yamb^Λ com c subeñetla. Jini jach com tsictis^Λbeñetla jini tsa' b^Λ i cha'le Cristo che' ñac ti' c'^Λñ^Λayon. Che' ñac tic subeyob i t'an Dios jini mach b^Λ israelobic, Dios ti' c'^Λñ^Λ c t'an yic'ot bajche' tic cha'le cha'an i y^Λq'ueñob i ch'ujbiben Dios.

¹⁹ Dios ti' p^Λs^Λ i p'^Λty^Λlel ti seña tyac yic'ot ti ñuc tyac b^Λ i p'^Λty^Λlel. Ch'ujul b^Λ i Ch'ujlel Dios ti' cha'le toñel ti i p'^Λty^Λlel ti' pusic'alob cha'an ti' ch'ujbiyob. Che'^Λch ts'^Λc^Λl tic wen subu majlel jini t'an cha'an laj coty^Λntyel ti Cristo c'^Λl^Λ ti Jerusalén c'^Λl^Λ ti pañimil Ilírico b^Λ i c'aba'.

20 Che' jini mic wen cha'len wersa c sub jini t'an cha'an laj coty^Λntyel ba' max tyo b^Λ ba'an ubibilob i cha'an i c'aba' Cristo, como mach com c cha'len toñel ba' ti' tyeche i toñel yamb^Λ.

21 Pero jini com b^Λ c subeñob jiñ^Λch bajche' mi y^Λle' ti Ts'ijbubil b^Λ i T'an Dios. Mi y^Λle':
Jini mach b^Λ ba'an ti saj subentiyob i t'an Cristo mi quej i jajmelob i wut yubil.

Jini max tyo ba'an ti yubiyob i t'an mi quej i ch'^Λmbeñob isujm.

Che' ts'ijbubil ti' t'an Dios.

Pablo mi' ña'tyan i majlel ti Roma

22 Jin cha'an, wersa com c subeñob i t'an Dios jini max tyo b^Λ ubibilob i cha'an. Aunque cab^Λl tic jop'o ty^Λlel cula'añetla pero max tyo ti mejliyon ti ty^Λlel.

23 Pero wale tsa'ix ujti c toñel w^Λ ti ili lum tyac. Anix cab^Λl jab com c ty^Λlel ya' ba'añetla.

24 Ba' b^Λ ora mic majlel ti pañimil España b^Λ i c'aba, com c poj jula' añetla che' mic ñumel ya' ba' añetla. Tijicña mi quej cubin cha'an mij q'ueletla. Che' jini che' tsa'ix cula'ayetla com mi la' cotyañon c majlel ya'i.

25 Pero wale mi quej c majlel ya' ti Jerusalén cha'an mic ch'^Λme' majlel tyaq'uin cha'an p'ump'uño' b^Λ ochemo' b^Λ ti' t'an Dios ya'i.

26 Como jini año' b^Λ ti Macedonia yic'ot ti Acaya tsa'ix i much'quiyob tyaq'uin tsa' b^Λ i lajayob i t'an i much'quin cha'an i chocob majlel i majtyan ba'an jini p'ump'uño' b^Λ ochemo' b^Λ ti' t'an Dios ya' ti Jerusalén.

27 Ch^Λ'^Λch ti' mulayob i cotyañob jini israelo' b^Λ ochemo' b^Λ ti' t'an Dios jini mach b^Λ israelobic. Ch^Λ'^Λch yom yubil como jini israelo' b^Λ ti' coty^Λyob jini mach b^Λ israelobic cha'an ti' subeyob jini wen b^Λ t'an cha'an laj coty^Λntyel ti Cristo. Jin cha'an jini mach b^Λ israelo' b^Λ hermañujob yomob i cotyañob jini israelo' b^Λ hermañujob ti ch^Λ b^Λ an i cha'añob.

28 Ba' b^Λ ora mi yujtyel ili c toñel cha'an mi c^Λq'ueñob jini tyaq'uin mi quej c loq'uel majlel cha'an mic majlel ya' ti España. Com cula'añetla che' mic ñumel majlel.

29 Cujil isujm che' mic ty^Λlel ya' ba' añetla mi quej i motin y^Λq'ueñonla Cristo cab^Λ i yutslel i pusic'al, joñon che' mic sube' i t'an, jatyetla che' mi la' wubin.

30 Wale mic subeñetla, la' wocolic hermañujob, cha'an ti lac Yum Jesucristo yic'ot cha'an ti caj mi lac p'untyan lac b^Λ cha'an ti Ch'ujul b^Λ i Ch'ujlel Dios, cha'lenla wersa quic'ot ti oración.

31 Pej^c^Λbeñonla Dios cha'an mach'an mi' ty^Λc'lañoñob jini mach b^Λ saj yom i ch'ujbin Cristo ya' ti pañimil Judea b^Λ i c'aba'. C'ajtibenla Dios je'el cha'an hermañujob ya' ti Jerusalén mi quej i mulan i ch'^Λmob jini tyaq'uin ch^Λncol b^Λ c ch'^Λmbeñob majlel.

32 C'ajtibenla Dios je'el cha'an mi ch^Λ'^Λch yom i pusic'al, tijicña c pusic'al mij c'otyel ti jula' ya' ba' añetla, yic'ot cha'an mi ñuc is^Λntyel c pusic'al che' ya' añon la' wic'ot.

33 La' ajnic la' wic'ot ti la' pejtyelel jini Dios mu' b^Λ i y^Λq'ueñonla i ñ^Λch'ty^Λlel lac pusic'al. Amén.

16

Saludo tyac

¹ Com mi la' cAn la quermana Febe. Mi' cha'len cotyaj che' bajche' diácono ba'an ochemo' bΛ ti' t'an Dios ya' ti Cencrea.

² PΛyΛa ochel ti la' wotyot che' bajche' yom che' hermañujonla ti lac Yum. Cotyanla mi an chΛ bΛ yom i cha'an como tsa'ix i cotyΛyob cabΛlob. Tsa'ix i cotyΛyon je'el.

³ Aq'ueñob saludos Priscila yic'ot Aquila. Ti' cha'lebeyob i toñel Cristo Jesús quic'ot.

⁴ Colel i tsAnsAntyelob cha'an ti' cotyΛyoñob. Mic subeñob wocox i yΛΛ. Mach c bajñel jach mic subeñob wocox i yΛΛ pero ti pejtyelel mach bΛ israelobic bΛ hermañujob je'el ba'ical jach mi' much'quiñob i bΛ mi subeñob wocox i yΛΛ, jini cha'tiquilob.

⁵ Aq'ueñob saludos je'el jini hermañujob mu' bΛ i much'quiñob i bΛ ya' ti yotyot Priscila yic'ot Aquila. Aq'uen saludos je'el jini p'untyΛbil bΛ Epeneto bΛ i c'aba', uts bΛ quic'ot. JiñΛch jini ñaxan bΛ tsa' bΛ i ch'ujbi lac Yum ya' ti pañimil Acaya bΛ i c'aba'.

⁶ Aq'uenla saludos jini María tsa' bΛ i cha'le cabΛ toñel ya' ba'añetla.

⁷ Aq'ueñob saludos Andrónico yic'ot Junias, jini israelo' bΛ c pi'Λlob. Ti cΛjchiyob je'el. Ñuc mi q'uejlelob cha'an jini chocolo' bΛ majlel ti subt'an. Ñaxan ti' ch'ujbiyob Cristo ti' pusic'al. Wi'ilon je'el.

⁸ Aq'uen saludos Amplias, jini uts bΛ quic'ot mu' bΛ c p'untyan ti lac Yum.

⁹ Aq'uen saludos Urbano, mu' b_Λ ti toñel la quic'ot ti i toñel Cristo Jesús. Aq'uen saludos je'el Estaquis mu' b_Λ c p'untyan.

¹⁰ Aq'uen saludos Apeles tsa' b_Λ i cucchu ti wen cab_Λl wocol cha'an ti' ch'ujbi Cristo. Aq'uen saludos je'el jini año' b_Λ ti yotyot Aristóbulo.

¹¹ Aq'uen saludos Herodión, juntiquil israel b_Λ c pi'Λl. Yic'ot aq'uen saludos je'el jini mu' b_Λ i ch'ujbin lac Yum año' b_Λ ti yotyot Narciso.

¹² Aq'uen saludos Trifena yic'ot Trifosa mu' b_Λ i wen cha'libeñob i toñel lac Yum. Aq'uen saludos je'el jini p'unty_Λbil b_Λ la quermana Pérsida tsa' b_Λ i cha'libe cab_Λl i toñel lac Yum je'el.

¹³ Aq'uen saludos Rufo, wen ñuc b_Λ ti lac Yum. Aq'uen saludos i ña' je'el. Che' bajche' c ña'Λch ti cubi.

¹⁴ Aq'uen saludos je'el Asíncrito, yic'ot Flegonte, yic'ot Hermas, yic'ot Patrobas yic'ot Hermes yic'ot yamb_Λ hermañujob ya' b_Λ añob yic'ot.

¹⁵ Aq'uen saludos je'el Filólogo yic'ot Julia yic'ot Nereo yic'ot x'ixic b_Λ i yijts'in yic'ot Olimpás yic'ot ti pejtyelelob hermañujob ti Cristo je'el ya' b_Λ añob yic'ot.

¹⁶ Aq'uen la' b_Λ saludos. Chucben la' b_Λ la' c'Λb. Ti pejtyelel hermañujob ti Cristo ti ba'ical jach mi' much'quiñob i b_Λ mi' chocbeñetla ty_Λlel saludos.

¹⁷ Hermañujob, ti wocol t'an mic subeñetla, ña'tyanla majchqui jini yom b_Λ i t'oxetla. Mi' jop' i y_Λsañetla ti mulil. Ch_Λncol i contrajiñob jini t'an tsa' b_Λ c_Λntis_Λntiyetla. Mach yom mi la' much'quin la' b_Λ yic'otyob.

¹⁸ Como jini mu' b_Λ i cha'len bajche' jini ma'an mi' cha'leñob bajche' yom lac Yum. Pero che'

jach mi' cha'leñob bajche' bajñel yom i pusic'al. Ti uts b_Λ t'an yic'ot c'otyajax b_Λ t'an mi' lotiñob quixtyañujob mach b_Λ ba'an mi' ña'tyan mi simaroñob.

¹⁹ Ti pejtyelel quixtyañujob mi' lu' ña'tyañob bajche' ti la' ch'ujbibe i t'an Dios. Jin cha'an tijicñayon cha'añetla. Com mi la' c_Λn jini wen b_Λ cha'an mi la' cha'len wen b_Λ. Mach com mi la' c_Λn la' cha'len mach'Λ wen.

²⁰ Dios mu' b_Λ i y_Λq'ueñonla i ñ_Λch'ty_Λlel lac pusic'al mach jalix mi quejel i jis_Λben i p'_Λty_Λlel Satanás cha'an ma'ix i bej ty_Λc'lañonla. La' ajnic la' wic'ot i yutslel i pusic'al lac Yum Jesucristo.

²¹ Mic chocbeñetla ty_Λlel saludos Timoteo, jini c pi'Λl ti toñel. Che' je'el Lucio yic'ot Jasón yic'ot Sosípater jini israelo' b_Λ c pi'Λlob.

²² Joñon Terciojon ch_Λncol b_Λ j cotyan ti ts'ijb Pablo cha'an ili jun, mic chocbeñetla ty_Λlel saludos ti lac Yum.

²³ Mi y_Λq'ueñetla saludos Gayo, i yum ili otyot ba' poj jijlemon yic'ot ba' mi' much'quiñob i b_Λ ochemo' b_Λ ti' t'an Dios. Mi y_Λq'ueñet saludos Erasto jini am b_Λ ye'tyel ti tesorero cha'an lum. Yic'ot je'el, mi y_Λq'ueñetla saludos lac hermano Cuarto.

²⁴ La' ajnic i yutslel i pusic'al lac Yum Jesucristo la' wic'ot ti la' pejtyelel. Amén.

I subentyel i ñucllel Dios

²⁵ La' lac suben i ñucllel Dios. Dios ch'ujbi i más xuc'chocobeñetla la' pusic'al che' bajche' mi y_Λle' jini wen b_Λ t'an cha'an laj coty_Λntyel tsa' b_Λ c subeyetla che' ñac tij c_Λntis_Λy_Λetla cha'an Jesucristo. Mi' xuc'chocobeñetla la' pusic'al bajche' mi

y_Λle' Dios ti i t'an max tyo b_Λ ti y_Λc'_Λ ti tsictiyel ti yamb_Λ ora c'_Λl_Λ ñoj oniyix che' max tyo ti mejli mulawil, c'_Λl_Λ wale.

²⁶ Pero wale tsictiyemix jini t'an ti Ts'ijbubil b_Λ i T'an Dios tsa' b_Λ y_Λc'_Λ i ts'ijbuñob winicob tsa' b_Λ xiq'ui y_Λle' Dios ti ñoj oniyix. Dios, jini cuxul b_Λ ti bele' ora, ti' xiq'uiyob quixtyañujob cha'an i puque' majlel ili t'an cha'an jini am b_Λ ti pejtyelel pañimil mi quejel i ch'ujbiñob Cristo yic'ot mi' jac'beñob i t'an.

²⁷ La' subjic i ñuclel Dios jini cojach b_Λ, jini am b_Λ ti pejtyelel ña'ty_Λbal_Λ. La' subjic i ñuclel ti Jesucristo c'_Λl_Λ ti bele' ora. Amén.

JINI WEN BA T'AN
The New Testament and portions of the Old Testament
in the Tila dialect of the Chol language of Mexico
La Santa Biblia en el Chol de Tila

copyright © 2008 La Liga Bíblica

Language: Chol de Tila (Chol)

Dialect: Tila

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-08

PDF generated using Haiola and XeLaTeX on 11 Nov 2022 from source files dated 22 Nov 2019

bc403b33-5815-586a-ab64-716de5d20d17